


ՍՏԵՖԱՆ ՑՎԱՅԳ

1881-1942



Ավստրիացի հանրաճանաչ գրող **Ստեֆան Ցվայգի** գրիչը շատ բեղմնավոր է եղել: Իր կյանքի ընթացքում նա գրել է բազմաթիվ վիպակներ, պատմվածքներ ու նորավեպեր, երկու վեպ, բանաստեղծություններ, հոդվածներ, նամակներ, հուշագրություններ, բազմաթիվ արվեստագետների գործերի հետազոտություններին վերաբերող աշխատություններ:

Ծնվել է Վիեննայում 1881թ.: Նրա մանկության ու պատանեկության մասին քիչ բան է հայտնի: Հենց ինքը՝ գրողը չէր սիրում որևէ բան պատմել, միայն ասում էր, որ իր կյանքն ընթանում է այնպես, ինչպես դարասկզբում բոլոր մտավորականների կյանքը:

1900 թ. Ստեֆանն ընդունվում է Վիեննայի համալսարանը: Գրել սկսել է վաղ տարիքից: 16 տարեկանում նա արդեն տպագրել էր իր բանաստեղծությունները, իսկ ուսման տարիներին իր սեփական միջոցներով հրատարակեց առաջին ժողովածուն՝ «Արծաթե լարեր» վերնագրով: Հաջողությունը ոչ միայն իրեն երկար սպասել չտվեց, այլև վրա հասավ ակնթարթորեն: Սակայն իրական փառքը վրա հասավ պատերազմից հետո գրված ստեղծագործությունների հետ՝ «Մարիա Անտոնյաներա», «Մարդկության աստղային ժամերը»:

Ցվայգի նովելները ունեն անսովոր դիպաշար ու դրամատիկ խորքեր: Նրանք մղում են մտածելու մարդկային ճակատագրի տարօրինակ ու անսպասելի շրջադարձերի մասին: Գրողն անդադար համոզում, հիշեցնում է ընթերցողին, թե որքան անպաշտպան է մարդու սիրտը, և ինչպիսի սխրանքների կամ նույնիսկ հանցագործության կարող է մղել կիրքը: Ցվայգը ստեղծեց նովելի իր սեփական, ինք-

նատիպ տեսակը, որը հիմնովին տարբերվում էր արդեն ճանաչում վայելող այլ վարպետների՝ տվյալ ժանրի ստեղծագործություններից: Նրա նովելների մեծ մասում իրադարձությունները հիմնականում տեղի են ունենում ճանապարհորդությունների ժամանակ, որոնք կարող էին լինել հետաքրքիր ու գրավող, ձանձրալի, իսկ որոշ դեպքերում՝ նույնիսկ վտանգավոր: Դրաման կարող է զարգանալ մի քանի ժամերի ընթացքում, բայց դրանք միշտ կյանքի կարևոր պահերն են, երբ փորձության է ենթարկվում անհատը, ասես ստուգվում է անձնագրիության ունակությունը:

Ավարտելով համալսարանն ու ստանալով դոկտորի աստիճան՝ Յվայգը մեկնում է Լոնդոն և Փարիզ, այնուհետև ճամփորդությունը շարունակում է Իտալիայում, Իսպանիայում, Հնդկաստանում, Չինաստանում, ԱՄՆ-ում, Կուբայում և Պանամայում: Առաջին աշխարհամարտի վերջին տարիներին ապրում էր Շվեյցարիայում, իսկ պատերազմից անմիջապես հետո բնակություն է հաստատում Զալցբուրգի՝ հայտնի երգահան Մոցարտի ծննդավայրի մոտակայքում:

Լինելով մարդասեր ու խաղաղասեր՝ Յվայգը ծանր է տանում ֆաշիստական Գերմանիայի ծավալած աշխարհակործան պատերազմը, որը մարդկանց կյանքը վերածել էր միայն մղձավանջ հիշեցնող երկար ու մութ գիշերվա: Այս հրաշալի գրողը կյանքից հեռանում է 1942 թ. Ռիո դը ժանեյրոյում: Իր հրաժեշտի նամակում նա գրում է. *«Ես ողջունում եմ իմ բոլոր բարեկամներին: Թող նրանք տեսնեն արշալույսը երկար գիշերից հետո: Իսկ ես չափազանց անհամբեր եմ և հեռանում եմ նրանցից առաջ»:*

ԱՆԾԱՆՈԹՈՒՀՈՒ ՆԱՄԱԿԸ

Ստեֆան Յվայգի «Անծանոթուհու նամակը» նովելն առաջին անգամ լույս է տեսել 1922 թվականին և հետագայում բազմաթիվ անգամներ վերահրատարակվել ու էկրանավորվել է:

Նովելի հիմքում մի կնոջ նամակ է, որում կյանքի տասնյակ տարիների պատմություն է շարադրված: Այս ստեղծագործությունը բոլորովին էլ արտաքին իրադարձությունների մասին չէ, այն հերոսուհու ներքին կյանքն է՝ սիրողի հոգու նկարագրությունը: Եվ կրկին մեր առջև հառնում է հարցը՝ սերն արարի՞չ, թե՞ կործանարար զգացմունք է:

* * *

Երբ հայտնի վիպասան Ռ.-ն՝ երեքօրյա ճամփորդությունից հետո՝ վաղ առավոտյան, վերադարձավ Վիեննա և ավտոկայանում ամսագիր գնելով՝ նայեց ամսաթվին, նա հանկարծ հիշեց, որ այսօր իր ծննդյան օրն է: «Քառասունմեկերորդ», - արագ մտածեց նա, բայց այս փաստը ո՛չ ուրախացրեց, ո՛չ էլ տխրեցրեց նրան: Արագ աչքի անցկացրեց թերթի էջերը, տաքսի կանգնեցրեց և ուղևորվեց դեպի իր բնակարան: Սպասավորը հայտնեց երկու մարդկանց այցելության, մի քանի հեռախոսազանգերի մասին և սկուտեղի վրա բերեց հավաքված նամակները: Գրողը ալարկոտությամբ նայեց նամակների կույտին, մի քանի ծրար բաց արեց՝ հետաքրքրվելով նամակագիրներով. անձանոթ ձեռագրով գրված նամակներից մեկը նրան ծավալուն թվաց, և նա այն մի կողմ դրեց: Սպասավորը թեյ մատուցեց: Հարմար տեղավորվելով բազկաթոռին՝ նա մեկ անգամ էլ թերթեց ամսագիրը, նայեց նամակներին, սիգար ծխեց և վերցրեց մի կողմ դրված նամակը:

Նամակը մոտ երեսուն էջ ուներ. գրված էր կնոջ ձեռագրով, շտապ ու ավելի շուտ ձեռագիր աշխատանք էր, քան նամակ: Ռ-ն մեկ անգամ էլ դժկամությամբ շոշափեց ծրարը՝ տեսնելու՝ արդյոք որևէ թերթ չի՞ մնացել այնտեղ: Բայց ծրարը դատարկ էր. ո՛չ ծրարի, ո՛չ էլ նամակի վրա հասցեատիրոջ անունը չկար: «Տարօրինակ



է», -մտածեց նա և նորից վերցրեց նամակը: «Քեզ՝ ինձ երբեք չճանաչողիդ», -գարմանքով կարդաց նա. կա՛մ վերնագիրն էր, կա՛մ նախաբանը: Ու՛մ էր վերաբերում: Իրե՛ն, թե՛ ինչ-որ հորինված հերոսի: Հետաքրքրություն արթնացավ նրա մեջ, և նա սկսեց կարդալ.

«Երեկ երեխաս մահացավ. երեք օր ու գիշեր ես պայքարում էի մահվան դեմ՝ հանուն փոքրիկ, փխրուն կյանքի: Քառասուն ժամ մինչ նրա խեղճ, տաք մարմինը վառվում էր, ես չէի հեռանում նրա անկողնուց: Ես սառույց էի դնում նրա վառվող ճակատին, գիշեր ու ցերեկ ավերիս մեջ էի պահում նրա անհանգիստ ձեռքերը: Երրորդ օրը՝ երեկոյան, ուժերս դավաճանեցին: Աչքերս, իմ կամքից անկախ, փակվում էին: Երեք կամ չորս ժամ քնեցի՝ նստած չոր աթոռին, և այդ ժամանակահատվածում մահը տարավ նրան: Այժմ նա պառկած է, սիրունի՛կ, խե՛ղճ բալիկ, իր նեղլիկ մանկական անկողնում, այնպիսին, ինչպիսին ես տեսա նրան, երբ արթնացա. միայն աչքերն են փակել, նրա խելացի, մուգ աչուկները, ձեռքերը ծալել են սպիտակ վերնաշապիկի վրա և չորս մոմ են վառել անկողնու չորս կողմը: Ես վախենում եմ այդ կողմ նայել, վախենում եմ տեղիցս շարժվել, որովհետև մոմերի կրակը տատանվում է, և շողքը անցնում է նրա դեմքի վրայով, սեղմված շրթունքների վրայով, և այդ ժամանակ ինձ թվում է, որ նրա դիմագծերը կենդանի են, և ես պատրաստ եմ հավատալ, որ նա չի մահացել, որ նա հիմա կարթնանա և իր բամբ ձայնով կասի ինձ ինչ-որ մանկական մի բան, քնքուշ մի բան: Բայց ես գիտեմ՝ նա մահացել է. ես չեմ ուզում նայել նրան, որ չզգամ հույսի քաղցրությունը և հիասթափության դառնությունը: Ես գիտե՛մ, գիտե՛մ, իմ փոքրիկը երեկ մահացել է. հիմա այս աշխարհում միայն քեզ ունեմ, քեզ, ով անհոգ խաղում է կյանքի հետ՝ չկասկածելով անգամ իմ գոյության մասին: Միայն դու, որ չէիր ճանաչում ինձ, և ում ես միշտ սիրել եմ:

Ես վառեցի հինգերորդ մոմը, դրեցի սեղանին և քեզ նամակ եմ գրում: Ես չեմ կարող միայնակ մնալ իմ մահացած փոքրիկի հետ և չգոռալ իմ ցավի մասին և ու՛մ հետ խոսեմ այս սարսափելի պահին, եթե ոչ քեզ հետ, չե՞ որ դու հիմա էլ, ինչպես միշտ, ինձ համար ամեն ինչ ես: Ես գուցե չկարողանամ հստակ խոսել քեզ հետ, գուցե չհասկանաս ինձ. մտքերս խառնվում են, ուղեղս՝ ցավում, ու բզկտվում է ամբողջ մարմինս: Ոնց որ տաքություն ունեմ, գուցե ես էլ եմ հարբուխով հիվանդացել, որ այժմ տնից տուն է մտնում. բայց լավ կլիներ այդպես, որովհետև ես փոքրիկիս հետևից կգնայի, և ամեն ինչ ինքնըստինքյան կդասավորվեր: Ժամանակ առ ժամանակ աչքերիս առաջ սևանում է, գուցե չկարողանամ ավարտել նա-

մակս, բայց կհավաքեմ ուժերս, որպեսզի գոնե մի անգամ, այս մի անգամը խոսեմ քեզ հետ, սիրելի՛ս, որը երբեք ինձ չճանաչեց:

Միայն քեզ հետ եմ ուզում խոսել, առաջին անգամ ուզում եմ պատմել քեզ ամեն ինչ. դու կիմանաս իմ ամբողջ կյանքը, որը միշտ քեզ է պատկանել, չնայած դու այդ մասին երբեք էլ չես իմացել: Բայց դու իմ գաղտնիքը կիմանաս միայն այն դեպքում, երբ ես մահանամ, որպեսզի կարիք չունենաս ինձ պատասխանելու, միայն եթե տենդս (որը մեկ տաքության մեջ է ինձ պահում, մեկ՝ ցրտի) վերջի սկիզբն է: Իսկ եթե կանխորոշված է, որ ես պիտի ապրեմ, ուրեմն ես կպատռեմ այս նամակն ու կշարունակեմ լռել, ինչպես որ միշտ լռել եմ: Բայց եթե դու ձեռքումդ ես պահում այս նամակը, ուրեմն իմացի՛ր, որ դրա մեջ մահացածը պատմում է քեզ իր կյանքը, իր կյանքը, որը քունն էր նրա առաջին և վերջին գիտակցական ժամերից: Մի՛ վախեցիր իմ բառերից. մահացածը բան չի պահանջի՝ ո՛չ սեր, ո՛չ կարեկցանք, ո՛չ սփոփանք: Միայն մի բան եմ ուզում քեզնից, որ դու հավատաս այն ամենին, ինչ կպատմի քեզ իմ պոռթկուն ցավը: Հավատա՛ դրան, միայն դա եմ խնդրում. ոչ ոք չի ստի իր միակ երեխայի մահվան ժամին: Ես կպատմեմ քեզ իմ ողջ կյանքը, որը իրականում սկսվեց այն օրը, երբ ես քեզ ճանաչեցի: Մինչ այդ օրը ամեն ինչ խամրած էր, մութ, այդտեղ իմ հիշողությունը էլ չի թափառում, այդ փոշոտ, սարդոստայնով լի ձեղնահարկը, որտեղ մարդիկ էին ապրում, որոնց ես վաղուց դուրս եմ նետել իմ սրտից:

Երբ դու հայտնվեցիր, ես տասներեք տարեկան էի և ապրում էի այն նույն տանը, որտեղ հիմա դու ես ապրում, այն նույն տանը, որտեղ դու այս նամակն ես կարդում՝ իմ կյանքի վերջին շունչը. ես ապրում էի այս նույն հարկում՝ հենց քո բնակարանի դիմացը: Դու գուցե արդեն չես հիշում մեզ՝ չինովնիկի համեստ այրուն (նա միշտ սզի մեջ էր) ու նիհարիկ դեռահասին. մենք միշտ ստվերում էինք՝ կաղապարված մեր աղքատ գոյության մեջ: Դու գուցե երբեք էլ չես լսել մեր մասին, որովհետև մեր դռան վրա ցուցանակներ չկային, և ոչ ոք չէր գալիս մեզ մոտ, ոչ ոք չէր հարցնում մեր մասին:

Այո՛, այնքան վաղուց էր այդ՝ տասնհինգ, տասնվեց տարի առաջ, ո՛չ, դու հաստատ չես հիշում, սիրելի՛ս, բայց ես, օ՛, ես ագահորեն հիշում եմ ամեն մանրուք, ես հիշում եմ, ասես այդ ամենը այսօր էր, այս պահին, այս րոպեին, երբ ես առաջին անգամ լսեցի քո մասին, առաջին անգամ տեսա քեզ, և ինչպե՛ս չհիշեմ, եթե հենց այդ ժամանակ աշխարհը բացվեց ինձ համար: Թո՛ւյլ տուր, սիրելի՛ս, պատմել քեզ ամենը, ամենասկզբից, նվիրի՛ր ինձ տասնհինգ րոպե և լսի՛ր համբերատարությամբ նրան, ով համբերատարությամբ սիրել է քեզ ամբողջ կյանքում:

Մինչ դու տեղափոխվեցիր մեր տուն, քո տանը ապրում էին զգվելի, չար, փնթփնթան մարդիկ: Չնայած նրանք էլ աղքատ էին, բայց ատում էին աղքատ հարևաններին, ատում էին մեզ, որովհետև մենք ոչ մի ընդհանուր բան չէինք ուզում ունենալ նրանց հետ: Տան գլխավորը հարբեցող էր և ծեծում էր կնոջը. մենք հաճախ արթնանում էինք գիշերվա կեսին՝ ընկող աթոռների և կոտրվող փսեսների ձայներից: Մի անգամ կինը դուրս թռավ ամբողջովին արյունոտ, հարբեցողն էլ գոռոցով հետևում էր նրան, բայց մյուս բնակարաններից դուրս եկան բնակիչները և սպառնացին ոստիկանություն կանչել: Մայրս ի սկզբանե խուսափում էր ամեն տեսակի շփումից այդ ընտանիքի հետ և ինձ էլ արգելել էր խոսել նրանց երեխաների հետ, իսկ վերջիններս էլ վրեժ էին լուծում ինձանից պատեհ առիթի դեպքում: Փողոցում նրանք վատ բաներ էին գոռում իմ հետևից, մի անգամ ձնագնդիկներով այնպես էին խփել, որ դեմքիցս արյուն էր հոսում: Ամբողջ տունը միահամուռ ատում էր այդ մարդկանց, և հանկարծ ինչ-որ բան պատահեց, կարծես ամուսինը բանտում հայտնվեց գողության համար, և նրանք ստիպված էին տեղափոխվել, ու մենք հանգիստ շունչ քաշեցինք: Երկու-երեք օր դարպասներին հայտարարություն էր փակցված՝ վարձով է տրվում, հետո այն անհետացավ, և տան կառավարչի միջոցով մենք իմացանք, որ բնակարանը վարձել է ինչ-որ գրող՝ միայնակ, պարկեշտ մի պարոն: Այդ ժամանակ ես առաջին անգամ լսեցի քո անունը:

Երկու երեք օրից բանվորներն եկան և մաքրեցին տունը նախկին տերերի կեղտերից: Նրանք մուրճով հարվածում էին, լվանում էին, ավլում էին, բայց մայրս միայն ուրախանում ու ասում էր, որ վերջապես վերջացավ հարևանների խայտառակությունը:

Քեզ դեռ չէի տեսել. բոլոր աշխատանքներին հետևում էր սպասավորդ, այդ ոչ բարձրահասակ, սպիտակահեղ մարդը, որը բոլորին վերևից էր նայում: Նա բոլորիս դուր էր գալիս, որովհետև սպասավորը մեր կողմերում հազվադեպ երևույթ էր, նաև որովհետև նա բոլորի հետ քաղաքավարի էր՝ միևնույն ժամանակ չհավասարվելով հասարակ ծառաներին և նրանց հետ ընկերական զրույցներ չունենալով:

Իմ մորը նա առաջին իսկ օրվանից հարգանքով խոնարհվում էր՝ որպես տիկնոջ, նույնիսկ ինձ հետ էր հարգալից, բայց լուրջ: Քո անունը նա միշտ արտասանում էր պատկառանքով, համարյա աստվածացնելով, և միանգամից երևում էր, որ դա սպասավորի միայն հասարակ նվիրվածություն չէ:

Եվ որքա՞ն շատ էի ես սիրում ծեր Իոհաննին, չնայած նախանձում էի նրան, որովհետև նա միշտ կարող էր ծառայել քեզ:

Ես պատմում եմ այս ամենը, սիրելի՛ս, որպեսզի դու հասկանաս, որ կարող էիր հենց ամենասկզբից իշխանություն ունենալ վախեցած երեխայի վրա, որպիսին ես էի: Դեռ ավելի շուտ, քան դու մտար իմ կյանք, քո շուրջը ինչ-որ հրեշտակային, հարուստ, ոչ հասարակ ու գաղտնիքներով լի մարդու ածականներ սկսեցին պտտվել: Մենք բոլորս մեր փոքրիկ տնակում, անհամբեր սպասում էինք քո գալստյանը. դու գիտես, թե ինչ հետաքրքրասեր են մարդիկ, որոնք ապրում են փոքր, նեղ աշխարհում: Եվ իմ հետաքրքրությունը միանգամից բռնկվեց, երբ ես տան առաջ տեսա կահույքով ավտոմեքենան: Ծանր իրերի մեծ մասը աշխատողներն արդեն բարձրացրել էին վերև և հիմա բարձրացնում էին ավելի փոքր առարկաներ. ես կանգնեցի դռան մոտ, որպեսզի այդ ամենը տեսնեմ, որովհետև քո բոլոր իրերը հիացնում էին ինձ. ես դրանց նմանները երբեք չէի տեսել: Այդտեղ կային հնդկական բաժակներ, իտալական արձանիկներ, մեծ, հիանալի, վառ նկարներ և վերջապես հայտնվեցին գրքերը, այնքա՞ն շատ ու այնքա՞ն գեղեցիկ, որ ես աչքերիս չէի հավատում: Դրանք շարքերով դնում էին դռան մոտ, այդտեղից էլ սպասավորն էր ընդունում ու ամեն գիրքը հոգատարությամբ դասավորում: Հետաքրքրությունից վառվելով՝ ես թափառում էի ավելացող իրերի մեջ. սպասավորն ինձ չէր հեռացնում, բայց և երես չէր տալիս, այդ պատճառով էլ ես չէի համարձակվում ձեռք տալ որևէ գրքի, չնայած շատ էի ուզում: Ես միայն կողքից վերնագրերն էի կարդում. այդտեղ կային ֆրանսիական, անգլիական, գրքեր, իսկ մի քանիսն էլ լրիվ անհասկանալի լեզուներով էին: Ես ժամերով կարող էի նայել դրանց, բայց մայրս ինձ տուն կանչեց:

Եվ ահա դեռ քեզ չճանաչելով՝ ես ամբողջ երեկո քո մասին էի մտածում: Ես ինքս միայն մի տասը էժանագին գրքեր ունեի, որոնք շատ էի սիրում և միշտ կարդում էի: Ինձ գրավում էր այն միտքը, թե ինչպիսին պետք է լինի այն մարդը, որը կարդացել է այդքան գեղեցիկ գրքեր, գիտի այդքան լեզու, որը այդքան հարուստ ու միևնույն ժամանակ կրթված է: Ինձ թվում էր, որ այդքան գիտակ կարող է լինել միայն գերմարդկային մի էակ: Փորձում էի մտովի նկարել քո պատկերը ու պատկերացնում էի, որ դու ծեր ես, ակնոցով ու երկար սպիտակ մորուքով. ճիշտ մեր աշխարհագրության ուսուցչի նման, միայն թե ավելի բարի, գեղեցիկ ու նուրբ: Չգիտեմ ինչու, բայց երբ նույնիսկ քեզ ծեր էի պատկերացնում, ես արդեն համոզված էի, որ դու պետք է որ գեղեցիկ լինես: Այդ ժամանակ, այդ գիշեր, չիմանալով քեզ, ես առաջին անգամ տեսա քեզ երազում:

Հաջորդ օրը դու տեղափոխվեցիր, բայց ինչքան էլ որ փորձում էի, չէի կարողանում հանդիպել քեզ, և դա ավելի էր բորբոքում իմ հետաքրքրությունը: Վերջապես երրորդ օրը ես տեսա քեզ և ինչքան զարմացա, երբ դու լրիվ ուրիշ էիր, ընդհանրապես տարբեր էիր այն աստվածային կերպարից, որը ես ստեղծել էի իմ մանկական երևակայությամբ: Ես պատկերացնում էի բարեսիրտ, ակնոցավոր մի ծերունի, և ահա հայտնվեցիր դու՝ հենց այնպիսին, ինչպիսին որ այսօր ես, դու չփոխված, դու, ում վրա տարիները հետքեր չեն թողնում: Հագիդ կար սպորտային մի հիանալի համազգեստ՝ բաց շագանակագույն, և դու քո թեթև, երիտասարդական քայլվածքով բարձրանում էիր աստիճաններով: Գլխարկդ ձեռքումդ էր, և ես աննկարագրելի հիացմունքով տեսա քո երիտասարդ, կենդանի դեմքը և բաց մազերը: Հավատացնում եմ քեզ՝ ես վախեցա, որովհետև ինձ ցնցեց, որ դու այդքան երիտասարդ էիր, գեղեցիկ, ամրակազմ ու իդեալական: Եվ տարօրինակ չէ՞արդյոք, որ այդ առաջին վայրկյանին ես միանգամից զգացի այն, ինչը քո մեջ բոլորին միանգամից հիացրել է՝ քո երկակիությունը. դու՝ թեթևամիտ, խաղով ու արկածներով տարված մի երիտասարդ, իսկ միննույն պահին՝ քո արվեստում խիստ, պարտքին հավատարիմ, անսահման կարողացած և կրթված մարդ: Ես հասկացա, ինչպես հասկանում էին բոլորը, որ դու ապրում ես երկու կյանքով՝ լուսավոր, վառ կողմով այն արտաքին աշխարհին է միտված, իսկ մյուսը՝ մութ, որ միայն դու գիտես: Սա խոր երկատվածություն է, և քո կեցության այդ գաղտնիքը ես՝ տասներեք տարեկան աղջնակս, բացահայտեցի առաջին իսկ հայացքից:

Հիմա հասկանո՞ւմ ես, սիրելի՛ս, ի՞նչ հրաշք, ի՞նչ հանելուկ դարձար դու ինձ համար, ինձ՝ կիսաերեխայիս համար: Մարդ, որի առաջ խոնարհվում էին, որովհետև նա գրքեր էր գրում, որովհետև նա հայտնի էր ինձ անհայտ մեծ աշխարհում, հանկարծ պարզվեց, որ երիտասարդ, առույգ, զվարճալի քսանհինգամյա պատանի էր: Կարիք կա՞ պատմելու, որ այդ օրվանից մեր տանը, իմ մանկական ողջ մոայլ աշխարհում ոչ մի բան ինձ այդքան չէր գրավում, որքան դու, որ ես իմ ամբողջ համառությամբ, տասներեք տարեկան աղջնակի ամբողջ ուժով մտածում էի միայն քո մասին, քո կյանքի մասին: Ես ուսումնասիրում էի քեզ, ուսումնասիրում էի քո սովորությունները, քեզ մոտ եկող մարդկանց, բայց այս ամենը ոչ միայն չէր հագեցնում իմ հետաքրքրասիրությունը, այլև ուժեղացնում էր այն, որովհետև քո երկակիությունը հստակ արտացոլվում էր քո այցելուների տարբերության մեջ: Գալիս էին երիտասարդներ, քո ընկերները, որոնց հետ դու ծիծաղում ու կատակում էիր, գալիս էին ուսանողներ, նույնիսկ մեքենաներով գալիս էին կանայք, մի օր եկավ օպերային թատրոնի տնօրենը, հանրահայտ դիրիժորը՝ դիրիժորական

փայտիկը ձեռքին, որին ես միայն հեռվից էի տեսել, գալիս էին նաև երիտասարդ աղջիկներ, որոնք դեռ դպրոց էին գնում, և որոնք ամաչում ու շտապում էին արագ ներս մտնել դռնից, ընդհանրապես շա՛տ, շա՛տ-շա՛տ կանայք էին գալիս: Ես այդ մասին չէի մտածում հիմնականում, նույնիսկ այն օրվանից հետո, երբ մի առավոտ՝ դասի գնալիս, տեսա քո մոտից հեռացող, քողով ծածկված մի կնոջ: Չէ՞ որ ես ընդամենը տասներեք տարեկան էի և չգիտեի, որ անհագ հետաքրքրասիրությունս, որով ես հետևում էի քեզ, սեր է:

Բայց ես գիտեմ, սիրելի՛ս, հստակ օրն ու ժամը, երբ քեզ ամբողջ հոգով տրվեցի: Զբոսանքից վերադառնալով՝ ես ու իմ դպրոցական ընկերուհին շատախոսում էինք մուտքի մոտ: Այդ ժամանակ մի մեքենա եկավ և չհասցրեց կանգ առնել, երբ դու քեզ բնորոշ արագությամբ և ճկուն շարժումնով, որը ինձ հիմա էլ է գրավում, դուրս եկար ավտոմեքենայից: Ինքնաբերաբար վազեցի դեպի դուռը, որպեսզի այն բաց անեմ քեզ համար, և մենք համարյա բախվեցինք իրար: Դու նայեցիր ինձ տաք, նուրբ, գրավիչ հայացքով և մեղմ ժպտացիր, այո՛, հենց մեղմ ժպտացիր և ցածր ձայնով ասացիր. «Շատ շնորհակալություն, դո՛ւնապա՛ն»:

Ահա և վերջ, սիրելի՛ս, բայց հենց այդ վայրկյանից, երբ զգացի քո նուրբ, գրավիչ հայացքը, ես քոնն էի: Հետագայում ես շատ շուտ իմացա, որ այդ գրկող, կանչող, գրավիչ և միևնույն ժամանակ մերկացնող, ի ծնե գայթակղողի հայացք դու կողքովդ անցնող ամեն կնոջ ես նվիրում, ամեն վաճառողուհու, ամեն աղախնի, որը դուռ է բաց անում քեզ համար, իմացա, որ այդ հայացքը քո կամքից անկախ է ստացվում և չի արտահայտում որևէ զգացմունք, այլ դառնում է տաք ու մեղմ, երբ դիմում ես կնոջը: Բայց ես՝ տասներեքամյա երեխաս, այդ չէի էլ կասկածում. ես կրակովդ վառվում էի: Ես կարծում էի, որ այդ նրբությունը միայն ինձ էր վերաբերում, միայն ինձ, և այդ ժամանակ իմ՝ դեռահասիս մեջ արթնացավ կինը, և նա ընդմիջտ դարձավ քոնը:

-Ո՞վ է նա,-հարցրեց ինձ ընկերուհիս: Ես չկարողացա միանգամից պատասխանել: Ես չէի կարողանում ինքս համոզել ինձ արտասանել քո անունը. այդ պահին անունդ սրբություն էր դարձել ինձ համար, այն իմ գաղտնիքն էր:

-Մեր տան ապրողներից մեկն է, էլի,- անհարմար զգալով՝ պատասխանեցի ես:

-Բա ինչու՞ այդպես կարմրեցիր,- մանկական չարությամբ ծիծաղեց նա: Եվ քանի որ նա ծաղրելով փորձեց բացահայտել իմ գաղտնիքը, արյունն ավելի արագ էր հասնում այտերիս: Ամաչելով ես կոպտորեն գոռացի.

-Հիմարի՛ մեկը:

Ես պատրաստ էի նրան խեղդել, բայց նա քրքջաց ավելի բարձր ու ծաղրալի վերջապես անկարողության արցունքներ հայտվեցին աչքերիս: Ես շրջվեցի ու վազեցի վերև:

Այդ վայրկյանից ես քեզ սիրեցի: Գիտեմ՝ կանայք հաճախ են ասում այս բաները՝ քեզ գոհացնելու համար: Բայց, հավատա՛ ինձ, ոչ ոք քեզ այսպիսի ստրկային նվիրվածությամբ չի սիրել, ինչպես այն արարածը, որը ես եմ եղել ու մնացել եմ միշտ քեզ համար, որովհետև ոչինչ աշխարհում չի կարելի համեմատել երեխայի սիրո հետ՝ այնպես մաքուր, անաղարտ, այնպես հնազանդ և փխրուն. այն երբեք պահանջկոտ չի լինում գուցե անգիտակցաբար, բայց մեծ կինը փոխադարձություն է պահանջում:

Միայն երեխաները կարող են պահել իրենց մեջ կիրքը, մյուսները իրենց զգացմունքները պատմում են ընկերուհիներին, խլացնում են սիրելիին խոստովանություններով, որովհետև նրանք հաճախ են լսել ու կարդացել սիրո մասին և գիտեն, որ սիրուց չի լինում փախչել: Նրանք գլուխ են գովում, ինչպես երեխան՝ տիկնիկով, ինչպես տղան՝ իր առաջին ծխած սիգարետով: Բայց ես, ես չունեի ոչ մեկին, ում կարողանայի վստահել, ոչ ոք չէր զգուշացնում ինձ, ես անմեղ ու անփորձ էի: Ես ընկա ճակատագրիս մեջ, ինչպես անդունդը: Դու ամեն ինչ էիր ինձ համար. հայրս վաղուց մահացել էր, իսկ մորիցս, որ միշտ հիմարաբար խեղճ այրի էր խաղում ու ապրում էր միայն թռչակով, ես միշտ հեռու էի: Թերթևամիտ համադասարանցիներս վանում էին ինձ, որովհետև նրանք չհասկանալով խաղում էին նրանով, ինչը ինձ համար բարձրագույն կիրք էր. այսպիսով իմ ողջ հույզերը, իմ բոլոր ճնշված, բայց դուրս ցայտող զգացմունքները քեզ էին նվիրված: Դու ինձ համար, ինչպես բացատրեմ, յուրաքանչյուր համեմատություն, առանձին վերցրած, շատ նեղ է, դու հենց ամեն ինչ էիր ինձ համար, իմ ամբողջ կյանքն էիր: Ամեն ինչ գոյություն ուներ միայն, որովհետև կապ ուներ քեզ հետ, ամեն ինչ իմ կյանքում միայն այն դեպքում իմաստ ուներ, եթե կապված էր քեզ հետ: Դու փոխեցիր իմ ամբողջ կյանքը: Մինչ այդ անտարբեր ու միջակ աշակերտուհին հանկարծ առաջինը դարձավ դասարանում. ես հարյուրավոր գրքեր էի կարդում, մինչ ուշ գիշեր կարդում էի, որովհետև գիտեի, որ դու սիրում ես գրքեր: Ի զարմանս մորս՝ ես ջանասիրաբար սկսեցի դաշնամուր պարապել, քանի որ ենթադրում էի, որ դու երաժշտություն սիրում ես: Ես կարդում էի ու հագուստներս էի կարկատում, որպեսզի վատ հագնված չտեսնեիր ինձ, և ես ահավոր տառապում էի դպրոցական գոգնոցիս ուղղանկյուն կարկատանի համար, որը կարված էր մորս հին զգեստից: Ես վախենում էի, որ դու կնկատես այդ կարկատանը, այդ պատճառով ամեն անգամ աս-

տիճաններով բարձրանալիս ծախ կողմում պայուսակս ու գրքերս էի պահում և վախից դողում էի՝ հանկարծ չտեսնես կարկատանը: Բայց ի՞նչ ծիծաղելի էր վախս, որովհետև դու երբեք, համարյա երբեք չէիր նայում ինձ վրա:

Ինչևէ, ես ամբողջ օրը սպասում էի, հետևում էի քեզ: Մեր դռան վրա մեծ կլոր անցք կար, որով հնարավոր էր տեսնել քո դուռը: Այդ անցքը... (ո՛չ, մի՛ ծիծաղիր, սիրելի՛ս. ես նույնիսկ հիմա չեմ ամաչում դրա մոտ անցկացրածս ժամերի համար) իմ պատուհանն էր դեպի աշխարհ. այդ սառը միջանցքում, վախենալով, որ մայրս կտեսնի, ես գիրքը ձեռքիս երեկոները սպասում էի քեզ: Ես ասես ձգված լար լինեի, որը դողում էր քո մոտենալուն պես: Ես երբեք չեմ լքել քեզ, միշտ անթարթ հայացքով հետևում էի քեզ, բայց քեզ համար դա այնքան աննկատելի էր, որքան ժամացույցների ձգված ոլորակները, ժամացույցներ, որոնք դու գրպանումդ ունես, որոնք մթության մեջ հաշվում են քո օրերը և ուղեկցում են քեզ քո կյանքի ուղիներում, բայց դու միայն մի վայրկյան ես հայացք նետում նրանց վրա: Ես քո մասին ամեն ինչ գիտեի, քո բոլոր սովորությունները, բոլոր փողկապները, բոլոր կոստյումները ես գիտեի և շուտով սկսեցի տարբերակել քո բոլոր ծանոթներին. ես բաժանում էի նրանց երկու մասի՝ ովքեր ինձ դուր էին գալիս և ում ատում էի: Տասներեքից տասնվեց տարեկանը ես ապրում էի միայն քեզանով: Ա՛խ, որքա՛ն հիմարություններ եմ արել: Ես համբուրում էի դռան բռնակը, որին քո ձեռքն էր դիպել, ես վերցնում էի սիգարի մնացորդը, որը դու էիր գցել մինչ տուն մտնելը, և այն ինձ համար սրբություն էր, որովհետև դրան էին հավել քո շուրթերը: Երեկոները ես հարյուր անգամ ինչ-որ պատրվակով դուրս էի վազում փողոց, որպեսզի տեսնեմ՝ քո որ սենյակում է լույս վառվում, և որպեսզի ավելի ուժեղ զգամ քո ներկայությունը: Իսկ քո բացակայության ժամանակ սիրտս վախից կծկվում էր ամեն անգամ, երբ տեսնում էի բարի Իոհաննին, որ իջնում էր ներքև քո դեղին ճամպուկով. իմ կյանքը երկար շաբաթներով սառչում էր և կորցնում ամեն իմաստ: Կարոտած, չար քայլում էի ես տան մեջ՝ վախենալով, որ մայրս իմ արտասովախառն աչքերից կհասկանա ցավս:

Ես գիտեմ՝ այս ամենը, ինչ պատմում եմ քեզ, երեխայական ծիծաղելի արարքներ են: Ես պետք է ամաչեի դրանցից, բայց չեմ ամաչում, որովհետև երբեք իմ սերը քո հանդեպ ավելի մաքուր ու կրակոտ չի եղել, քան այդ վաղ մանկական հիացմունքի ժամանակներում: Ժամերով, օրերով ես կարող եմ պատմել քեզ, թե ինչպես էի ապրում քեզնով, որ համարյա դեմքս էլ չգիտեիր, որովհետև աստիճանների վրա քեզ հանդիպելիս, վախենալով քո կրակոտ հայացքից, գլուխս կախում ու կողքովդ անցնում էի, ասես մեկը լինեի, ով ջուրն է նետվում՝ կրակից

փրկվելու համար: Ժամերով, օրերով ես կարող եմ պատմել քեզ մոռացված այն տարիների մասին, կարող եմ քո կյանքի օրացույցը կազմել, բայց ես չեմ ուզում ձանձրացնել քեզ, չեմ ուզում տանջել քեզ: Միայն մեկ անգամ կպատմեմ քեզ իմ մանկության ամենաերջանիկ դեպքի մասին, ես խնդրում եմ քեզ, չծիծաղես, որովհետև ինչքան էլ աննշան թվա, ինձ՝ երեխայիս համար, դա անսահման երջանկություն էր: Պատահեց դա մի կիրակի. դու ճամփորդության էիր, և քո սպասավորը բաց դռնից դուրս էր հանում հենց նոր ներս տարած ծանր գորգերը: Ծերուկը դժվարանում էր, և ես հանկարծ խիզախեցի ու մոտեցա նրան, հարցրի. «Կարո՞ղ եմ օգնել»: Նա զարմացավ, բայց չմերժեց օգնությունս, և այդպես ես տեսա, (եթե ես միայն կարողանայի արտահայտել, թե ինչ հարգանքով, ինչ աստվածացմամբ ու դողով լի էի), ես տեսա քո տան ներսը, քո աշխարհը, քո գրասեղանը, որի մոտ դու աշխատում ես, դրա վրա կապույտ ծաղկամանով ծաղիկներ էին, քո պահարանը, նկարները, գրքերը: Ես միայն մի թեթև հայացք կարողացա նետել դեպի քո աշխարհը, որովհետև հավատարիմ Իոհաննը, իհարկե, թույլ չէր տա ինձ նայել ավելի մոտիկից, բայց այդ միակ հայացքով ես քո բնակարանի ամբողջ մթնոլորտը կլանեցի, և դա կերակուր դարձավ իմ անթիվ երազանքների՝ քնած, թե արթուն:

Այդ միջադեպը, այդ կարճ ակնթարթը մանկությանս ամենաերջանիկ պահն էր: Ես ուզում էի քեզ պատմել այդ մասին, որպեսզի դու՝ ինձ չճանաչողդ, վերջապես զգաս, թե ինչպես մի մարդկային կյանք վառվում ու մոխրանում էր քեզ համար:

Այս դեպքի մասին ես ուզում էի պատմել քեզ, նաև մեկ ուրիշի՝ ամենասարսափելիի մասին, որը, ցավոք, հետևեց առաջինին: Ինչպես քեզ արդեն ասել եմ, ես հանուն քեզ մոռացել էի ամեն ինչի մասին, չէի նկատում մորս, և ոչ մեկի ու ոչնչի վրա ուշադրություն չէի դարձնում: Ես նկատել էի, որ մի զառամյալ պարոն՝ Ինսբրուկից մի վաճառական՝ մորս հեռավոր ազգականներից մեկը, սկսել էր հաճախ լինել և մնալ մեր տանը. ես նույնիսկ ուրախանում էի, որովհետև նա մորս թատրոն էր տանում, և ես, մնալով տանը, առանց խոչընդոտի կարող էի մտածել քո մասին, սպասել քեզ, և դա իմ ամենամեծ, իմ միակ երջանկությունն էր: Եվ ահա մի օր մայրս հանդիսավորությամբ կանչեց ինձ իր սենյակ և ասաց, որ մենք պետք է լուրջ խոսենք: Ես գունատվեցի, սիրտս կանգնեց. միայն թե չկասկածեր, գլխի չընկներ: Իմ առաջին միտքը քո մասին էր, գաղտնիքիս մասին, որը ինձ կապում էր կյանքին: Բայց մայրս ինքը անհանգիստ էր, նա մեղմ համբուրեց ինձ (ինչը երբեք չէր անում), նստեցրեց կողքին՝ բազկաթոռին, և սկսեց կարմրելով պատ-

մել, որ իր այրի բարեկամը առաջարկություն է արել իրեն և որ ինքը հիմնականում ինձ համար որոշել է համաձայնվել: Սիրտս ավելի ուժեղ խփեց, ի պատասխան մորս խոսքերի՝ միայն մի բան արտաբերեցի դժվարությամբ.

-Մենք այստեղ ենք չէ՞ մնալու:

-Ո՛չ, մենք կտեղափոխվենք Ինսբրուկ. այնտեղ Ֆերդինանտը հիանալի վիլլա ունի:

Ես ուրիշ ոչինչ չլսեցի: Աչքերիս առաջ սևացավ: Հետո իմացա, որ ուշագնաց եմ եղել: Ես լսում էի, թե ինչպես մայրս կիսաձայն պատմում էր դռան հետևում սպասող հայրացուիս, որ ես, հանկարծ ձեռքերս թուլացնելով, ընկա գետնին: Չեմ կարող նկարագրել, թե ինչ էր կատարվում մոտակա օրերին, ինչպես ես՝ անօգնական երեխաս, պայքարում էի բոլոր մեծերի կամքի դեմ: Նույնիսկ հիմա, երբ գրում եմ այդ մասին, ձեռքերս դողում են: Ես չէի կարող գաղտնիքս պատմել, այդ պատճառով իմ դիմադրությունը միայն չար համառություն էր թվում: Ոչ ոք էլ հետս չէր խոսում, ամեն ինչ իմ մեջքի հետևում էր արվում: Տեղափոխության պատրաստությունները արվում էին այն ժամերին, երբ ես դպրոցում էի. Ամեն օր, վերադառնալով տուն, ես տեսնում էի, որ ևս մեկ իր վաճառվել կամ տեղափոխվել է: Իմ աչքերի առաջ քանդվում էր մեր բնակարանը, իսկ դրա հետ նաև իմ կյանքը, և մի օր, տուն վերադառնալով, իմացա, որ մեր կահույքն էլ են տարել: Դատարկ սենյակներում դրված էին տեղափոխությանը պատրաստ ճամպուրկներ և երկու ծալվող անկողին՝ մորս ու ինձ համար: Այստեղ մենք պետք է մի գիշեր էլ անցկացնեինք՝ վերջինը, իսկ առավոտյան մեկնեինք Ինսբրուկ:

Այդ վերջին օրը ես հստակ իմացա, որ քեզնից հեռու չեմ կարող ապրել: Քո մեջ էի միայն տեսնում իմ փրկությունը: Ինչ էի մտածում կամ ընդհանրապես կարող էի խելամտորեն տրամաբանել այդ դժվար պահերին՝ ես այդ չգիտեմ, բայց հանկարծ մայրս ինչ-որ տեղ գնաց, ես վեր թռա հենց դպրոցական համազգեստովս վազեցի քեզ մոտ: Ո՛չ, ես չէի վազում, այլ մի անբացատրելի ուժ ինձ հրում էր քո դռան մոտ, ես ամբողջովին դողում էի և դժվարությամբ էի տեղաշարժում քարացած ոտքերս: Ես պատրաստ էի (ինքս հստակ չգիտեի՝ ինչ էի ուզում) ընկնել ոտքերդ, աղաչել քեզ, որ ինձ քեզ մոտ պահես որպես աղախին, որպես ստրուկ: Վախենամ՝ ծիծաղես տասնհինգամյա աղջնակի վրա, բայց, սիրելի՛ս, դու չէիր ծիծաղի, եթե իմանայիր՝ ինչպես էի այդ ժամանակ, վախից կծկված, կանգնած սառը միջանցքում, և հնազանդվելով ինչ-որ անտեսանելի ուժի՝ ստիպեցի իմ դողացող ձեռքին, ասես պոկելով այն մարմնիցս, բարձրանալ ու կարճ, բայց հավիտենականություն տևող դաժան պայքարից հետո սեղմել զանգի կոճակը: Ես մինչ այսօր

լսում եմ ականջ ծակող զանգն ու դրան փոխարինող լռությունը, երբ արյունս կանգնել էր, երբ սիրտս դադարել էր աշխատելուց:

Բայց դու դուրս չեկար: Ոչ ոք դուրս չեկավ: Հավանաբար դու տանը չէիր, իսկ Իոհանը նույնպես գնացել էր՝ ինչ-որ բան գնելու: Եվ ահա ես դանդաղ հեռացա՝ ականջներումս պահելով զանգի ձայնը: Չորս քայլ անցնելով՝ ես ավելի շատ հոգնեցի, քան եթե մի քանի ժամ քայլեի ձյան վրայով: Բայց ոչնչին ուշադրություն չդարձնելով՝ իմ մեջ ավելի ու ավելի ուժգին վառվեց քեզ տեսնելու, քեզ հետ խոսելու հաստատակամությունը: Երդվում եմ, մտքումս ուրիշ ոչինչ չկար, և ես դեռ ոչինչ չգիտեի, հենց այն պատճառով, որ բացի քեզանից ուրիշ ոչնչի մասին չէի մտածում. ես ուզում էի տեսնել քեզ, մեկ անգամ էլ տեսնել, զգալ քո մերձավորությունը: Ամբողջ գիշեր, այդ երկար ողջ գիշերը, այդ ահավոր գիշերը ես քեզ էի սպասում, սիրելի՛ս: Հենց որ մայրս պառկեց քնելու և քնեց, ես դուրս թռա միջանցք ու սկսեցի ականջ դնել քո ոտնաձայներին՝ տեսնելու համար՝ զալի՛ս ես, թե՛ ոչ: Ես ամբողջ գիշեր սպասում էի քեզ, հունվարյան մի ամբողջ գիշեր: Ես հոգնեցի, ամբողջ մարմինս ջարդվում էր, և նույնիսկ աթոռ չկար, որպեսզի նստեի, ես հենց սառը գետնին պառկեցի, որտեղ դռան տակից ուժեղ փչում էր քամին: Մի բարակ զգեստով ես պառկած էի չոր, սառը գետնին, նույնիսկ ծածկոց չունեի. վախենում էի, որ տաքանալով կքնեմ ու չեմ լսի քո ոտնաձայները: Սարսափելի էր. ես ջղաճգորեն սեղմում էի ոտքերս, ձեռքերս դողում էին, ստիպված էի վեր կենալ, քայլել, որպեսզի գոնե մի քիչ տաքանամ: Բայց ես սպասում էի, սպասում էի իմ ճակատագրին:

Վերջապես (երևի արդեն ժամը երկուսը կամ երեքն էր) ես լսեցի, թե ինչպես ներքևում փակվեց մուտքի դուռը, հետո աստիճանների վրա լսվեցին ոտնաձայներ: Այդ պահից ի վեր ես դադարեցի մրսելուց, զգացի, թե ինչպես է մարմնովս ջերմություն անցնում, կամացուկ բացեցի դուռը՝ պատրաստ քեզ դեմ դուրս գալու, ընկնելու ոտքերիդ առաջ...Ա՛հ, նույնիսկ չգիտեմ՝ ինչ կանեի ես՝ հիմար երեխաս: Ոտնաձայները մոտենում էին, երևաց մոմի լույսը: Դողալով ես բռնել էի դռան ամրակը: Դու՛ էիր, թե՛ ուրիշ մեկը:

Այո՛, դու էիր, սիրելի՛ս, բայց մենակ չէիր: Ես լսեցի նյարդային, խուլ ծիծաղ, մետաքսյա շորերի շրշյուն և քո ցածր ձայնը. դու տուն էիր վերադառնում ինչ-որ կնոջ հետ...

Չգիտեմ՝ ինչպես դիմացա ես այդ գիշեր: Առավոտյան ժամը ութին ինձ Ինսբրուկ էին տանում. ես էլ ուժ չունեի դիմադրելու:

Փոքրիկս երեկ գիշերը մահացավ, հիմա ես նորից մենակ կլինեմ, եթե ինձ ճակատագրով նախատեսված է դեռ ապրել: Վաղը կգան օտար, սևազգեստ մարդիկ, որոնք կբերեն դագաղը, կդնեն դրա մեջ իմ փոքրիկին, իմ խեղճ, իմ միակ երեխային: Գուցե գան ընկերներս ու բերեն ծաղկեպսակներ, բայց ի՞նչ են նշանակում ծաղիկները դագաղի մոտ: Ինձ կսկսեն մխիթարել, ասել ինչ-որ բառեր, բառեր, բառեր, բայց ինչո՞վ կօգնեն ինձ դրանք: Ես գիտեմ, որ միևնույն է մենակ եմ մնալու: Չէ՞ որ չկա ավելի սարսափելի բան, քան մենակությունը մարդկանց մեջ: Ես այդ իմացա այն ժամանակ, այն անվերջ երկու տարվա ընթացքում, որոնք անցկացրի Ինսբրուկում՝ տասնվեցից տասնութ տարեկանում, երբ ես՝ որպես պատանդ, որպես թշվառ, ապրում էի իմ ընտանիքում: Խորթ հայրս՝ շատ հանգիստ, խոսքերում ժլատ այդ մարդը, ինձ լավ էր վերաբերվում՝ ասես փորձելով իր ոչ մտադրված մեղքը հարթել դրանով. նա իմ բոլոր ցանկությունները կատարում էր: Երիտասարդները փորձում էին օգտվել իմ դիրքից, բայց ես կրքոտ համառությամբ մերժում էի նրանց բոլորին: Ես չէի ուզում երջանիկ լինել, չէի ուզում բավարարված լինել քեզանից հեռու: Ես հատուկ փակվում էի ինքնախարագանման ու միայնության մութ աշխարհում: Նոր զգեստները, որոնք ինձ համար գնում էին, ես չէի հագնում, ես հրաժարվում էի համերգներ, թատրոններ գնալուց, խնջույքներին մասնակցելուց: Ես համարյա դուրս չէի գալիս տնից, կհավատա՞ս, սիրելի՛ս, որ ես հազիվ մի քանի փողոց գիտեմ այս փոքրիկ քաղաքում, որտեղ երկու տարի ապրել եմ: Ես տառապում էի ու ուզում էի տառապել, ես արբեցնում էի ինձ տրտմության ամեն կաթիլով, որը չէր հագստացնում իմ ցավը, քեզ չտեսնելու ցավը: Եվ բացի դրանից՝ ես չէի ուզում, որ ինձ շեղեին իմ կրքից, ուզում էի ապրել միայն քեզանով: Ես տանն էի նստում օրերով և ոչ մի բան չէի անում, միայն մտածում էի քո մասին՝ նորից ու նորից մտաբերելով հազարավոր փոքր դրվագներ, ամեն հանդիպումը, ամեն սպասումը. ես երևակայությանս մեջ, ինչպես բեմի վրա, խաղում էի բոլոր այս փոքր աննշան դեպքերը: Եվ այն պատճառով, որ անվերջ կրկնում էի այդ վայրկյանները, իմ ողջ մանկությունը այսպիսի հստակությամբ է տպավորվել հիշողությանս մեջ. ես հիմա էլ զգում եմ այդ տարիների դառնությունը, ասես դա երեկ էր արյունս պղտորում:

Միայն քեզնով էի ես ապրում: Ես առնում էի քո բոլոր գրքերը, երբ քո անունը հիշատակվում էր թերթում, այդ օրն ինձ համար տոն էր: Կհավատաս թե ոչ՝ բայց ես անգիր գիտեմ քո բոլոր գրքերը. այնքան հաճախ էի դրանք վերընթերցում: Եթե ինձ գիշերը արթնացնեին և պատահական տող կարդային քո գրքից, կարող էի շարունակել մնացյալը, կարող եմ նույնիսկ հիմա՝ տասներեք տարի անց. քո յու-

րաքանչյուր բառն ինձ համար Ավետարան էր, աղոթք էր: Ամբողջ աշխարհը գոյություն ունեւր միայն քեզ հետ կապի շնորհիվ: Ես Վիեննական թերթերում կարդում էի համերգների, պրեմիերաների մասին միայն այն հույսով, որ դրանցից որևէ մեկը կարող է գրավել քեզ, իսկ երբ երեկո էր գալիս, ես հեռվից ուղեկցում էի քեզ. ահա դու մտնում ես դահլիճ, ահա նստում ես քո տեղը: Հազար անգամ պատկերացրել եմ այդ ամենը, որովհետև միայն մեկ անգամ եմ տեսել քեզ համերգի ժամանակ:

Բայց կարիք կա՞ պատմելու այս ամենի մասին: Մի միայնակ երեխայի անիմաստ ինքնախարազանման մասին կարիք չկա պատմելու նրան, ով նույնիսկ կասկած չի ունեցել նրա գոյության մասին: Չնայած, այդ ժամանակ ես երեխա՞ էի: Ես տասնյոթ-տասնութ տարեկան էի. երիտասարդներն սկսել էին ուշադրություն դարձնել ինձ վրա, բայց դա միայն զայրացնում էր ինձ:

Սերը կամ միայն սիրախաղը ինչ-որ մեկի հետ, բացի քեզանից, ինձ անիմաստ, անհնար էր թվում, և ես դավաճանություն էի համարում այդ: Իմ կիրքը դեպի քեզ անփոփոխ էր մնում, բայց մանկության ավարտից հետո՝ զգացմունքների արթնացման հետ մեկտեղ, այն դարձավ ավելի բուռն, ավելի կանացի ու երկրային: Եվ այն, ինչը աղջնակը չէր հասկանում ու տրվելով անհասկանալի պողոթկմանը՝ քո դռան զանգն էր տալիս, դարձել էր հիմա իմ միակ միտքը՝ նվիրվել քեզ, տրվել քեզ:

Ինձ շրջապատողները կարծում էին, թե վայրենի եմ, որովհետև ես, ատամներս սեղմած, պահում էի իմ գաղտնիքը: Բայց իմ մեջ մեծանում էր երկաթե համառությունը: Իմ բոլոր մտքերը և ձգտումները միայն մեկ բանի էին ուղղված՝ հետ գալ Վիեննա՝ քեզ մոտ: Եվ ես հասա իմ ուզածին, ինչքան էլ անիմաստ ու անհասկանալի թվա բոլորին իմ պահվածքը: Խորթ հայրս հարուստ մարդ էր ու ինձ իր աղջկա պես սիրում էր, բայց ես ինքս պնդեցի, որ ուզում եմ ինքնուրույն փող վաստակել, և վերջապես ինձ հաջողվեց գնալ Վիեննա և աշխատանքի ընդունվել մի բարեկամի զգեստների խանութում:

Պե՞տք է արդյոք քեզ պատմել՝ թե առաջինը որն էր իմ ուղին, երբ աշնանային մի մառախլապատ օր վերջապես հայտվեցի Վիեննայում: Ճամպրուկներս թողնելով կայարանում՝ ես նստեցի առաջին պատահած տրամվայը (ինձ թվում էր, թե այն կրիայի պես սողում է. ամեն կանգառ ինձ հունից հանում էր) և շտապեցի մեր հին տան մոտ: Քո պատուհաններում լույս էր վառվում, սիրտս երգում էր կրծիս տակ: Միայն այդ ժամանակ ինձ համար կենդանացավ ինձ այդքան սառն ու խլացուցիչ աղմուկով դիմավորած քաղաքը, հիմա միայն ես ինքս կենդանացա՞՝ զգա-

լով քո ներկայությունն ու քեզ, իմ անմա՛ր երազանք: Չէ՞ որ ես չէի գիտակցում, որ նույնքան օտար էի քեզ և՛ այն ժամանակ, երբ մեզ սարեր էին բաժանում, և՛ հիմա, երբ ընդամենը լուսավորված մի բարակ ապակի էր բաժանում քեզ իմ շողացող հայացքից: Ես կազնել ու նայում էի վերև. այնտեղ լույս կար, հայրենի տուն, դու՛ իմ ամբողջ աշխարհը: Երկու տարի ես երազում էի այս պահի մասին, և ահա այն ինձ շնորհվել էր: Ես կանգնեցի քո պատուհանների տակ մի ամբողջ երկար, տաք, ամպամած երեկո, մինչ անջատվեց լույսը: Հետո միայն ուղևորվեցի՝ փնտրելու նոր կացարան:

Ամեն երեկո ես կանգնում էի քո պատուհանների տակ: Մինչ ժամը վեցը ես զբաղված էի խանութում, զբաղված էի ծանր, տանջալի աշխատանքով, բայց ուրախ էի այդ անհանգիստ խառնաշփոթով, որովհետև այն ինձ շեղում էր իմ մեջ եղած տանջալի անհանգստությունից: Եվ հենց որ երկաթյա դարպասները շացունով փակվում էին իմ հետևից, ես վազում էի քո տան մոտ՝ տեսնելու քեզ. քեզ հանդիպելը, միայն մեկ անգամ հեռվից հայացքդ որսալը իմ միակ ցանկությունն էր: Մոտ մեկ շաբաթ անցավ, և ես վերջապես հանդիպեցի քեզ, պատահաբար հանդիպեցի, երբ չէի սպասում: Ես կանգնած էի տան առաջ և նայում էի քո պատուհանին, և այդ թուպին դու փողոցն անցար: Եվ հանկարծ ես նորից դարձա տասներեք տարեկան երեխա. զգացի, թե ինչպես արյունը բարձրացավ այտերիս, և կամքիցս անկախ, չնայած հայացքդ որսալու կրքոտ ցանկությանս, կախեցի գլուխս ու նետի պես սուրացի կողքովդ: Հետո ես ամաչեցի այդ երեխայական փախուստից. չէ՞ որ արդեն դպրոցական չէի ու լավ հասկանում էի՝ ինչ եմ ուզում. ես քեզ հետ հանդիպում էի փնտրում, ես ուզում էի, որ քո նկատմամբ կարոտի երկարատև ու մշուշապատ օրերից հետո երբ հանդիպե՞ք, դու ճանաչես ինձ, ուզում էի, որ նկատես ինձ, սիրես:

Բայց դու երկար ժամանակ չէիր նկատում ինձ, չնայած ես ամեն երեկո, անկախ փոթորկից ու մինչև ոսկորները թափանցող քամուց, կանգնում էի քո փողոցում: Երբեմն ես ժամերով զուր սպասում էի, երբեմն դու վերջապես դուրս էիր գալիս տնից ընկերներիդ ուղեկցությամբ, երկու անգամ ես տեսա քեզ կանանց հետ, և այդ ժամանակ զգացի, որ արդեն աղջնակ չեմ, փոփոխություն զգացի իմ սիրո մեջ մի հանկարծակի սուր ցավի միջոցով, որը պայթեցնում էր սիրտս, հենց որ տեսնում էի օտար կին, որն ինքնավստահ քայլում էր՝ ձեռքդ բռնած: Անսպասելի չէր այս ամենն ինձ համար, չէ՞ որ ես փոքրուց գիտեի, որ քեզ մշտապես այցելում են կանայք, բայց այժմ դա ինձ ֆիզիկական ցավ էր պատճառում, և ես զզվանքով էի նայում քո հերթական շինծու մտերմությանը ուրիշի հետ: Մի ան-

գամ, երեխայի պես համառ ու հպարտ (ինչպիսին եղել եմ և գուցե մինչ այսօր եմ), ես զայրացա ու չգնացի քո տան մոտ, բայց որքան սարսափելի ու դատարկ թվաց ինձ այդ երեկոն: Հաջորդ օրը ես նորից կանգնած էի քո պատուհանների տակ, կանգնել ու սպասում էի, ինչպես որ կանգնած ապրեցի մի ողջ դար իմ առջև փակ քո կյանքի առաջ:

Եվ վերջապես եկավ երեկոն, երբ դու նկատեցիր ինձ: Ես արդեն հեռվից տեսել էի քեզ ու ամբողջ կամքս լարում էի, որպեսզի չխուսափեմ քեզ հետ հանդիպումից: Փողոցում մի ինչ-որ սայլ էին դատարկում, և դու ստիպված էիր անցնել դրա կողքով: Դու ցրված հայացքով նայեցիր ինձ վրա, բայց նույն պահին, երբ նկատեցիր իմ ուշադիր հայացքը, քո աչքերում հայտնվեց ինձ ծանոթ արտահայտությունը (օ՛, ինչ սարսափելի էր հիշել այդ մասին), կանանց ծոնված հայացքը՝ մեղմ, շլացուցիչ և միևնույն ժամանակ մերկացնող, այն տիրող հայացքը, որը մի ժամանակ ինձ՝ երեխայիս, դարձրեց սիրող կին: Մեկ-երկու վայրկյան հայացքդ քարացրեց ինձ (ես չէի կարողանում ու չէի ուզում աչքերս հեռացնել), և ահա դու անցար իմ կողքով: Սիրտս անկանոն բաբախում էր, ակամա դանդաղեցրի քայլերս և տեղի տալով անսանձելի հետաքրքրասիրությանս՝ շրջվեցի. դու կանգնեցիր ու նայեցիր իմ հետևից: Եվ այն ուշադրությունից ու հետաքրքրասիրությունից, որով դու զննում էիր ինձ, ես հասկացա, որ դու չճանաչեցիր ինձ:

Ո՛չ այդ անգամ և ո՛չ էլ հետո դու չճանաչեցիր ինձ. դու երբեք չէիր ճանաչում ինձ: Ինչպե՛ս փոխանցեմ քեզ, սիրելի՛ս, այդ բոլոր ամբողջ հիասթափությունս: Այդ ժամանակ ես առաջին անգամ զգացի այն, ինչը ճակատագիրն էր նախատեսել՝ ճանաչված չլինել քո կողմից ամբողջ կյանքիս ընթացքում, մինչ մահ: Ինչպե՛ս փոխանցեմ քեզ իմ հիասթափությունը: Հասկանում ես, Ինսբրուկում անցկացրածս երկու տարում ես անընդհատ մտածում էի քո մասին և միայն երազում էի Վիեննայում մեր ապագա հանդիպման մասին ու տրամադրությունից կախված՝ նկարում էի ինձ համար ամենատխուր պատկերները ամենագեղեցիկի հետ միասին: Այդ ամենը վերապրում էի երևակայությանս մեջ. ամենատխուր բոլորներին ես կանխատեսում էի, որ դու կմերժես ինձ՝ զգվելով ինձանից, որովհետև ես չափազանց աննշան, տգեղ, կաչուն եմ: Ես մտովի վերապրել էի բոլոր տառապանքները, որոնք պատճառել էին քո սառնությունն ու անտարբերությունը, բայց նույնիսկ հուսահատության այդ պահերին, երբ ես գիտակցում էի, որ արժանի չեմ քո սիրուն, մտքովս անգամ չէր անցնում ամենասարսափելին, ամենամահացուն, որ դու ընդհանրապես չես նկատի իմ գոյությունը: Հիմա ես հասկանում եմ, օ՛, դու սովորեցրիր ինձ հասկանալ, որքան փոփոխական է կնոջ դեմքը տղամարդու հա-

մար, ավելի հաճախ այն միայն հայելի է, որն արտացոլում է մերթ կիրքը, մերթ մանկական խենթությունը, մերթ հոգեկան ծարավը և հավլում է, կորչում հիշողությունից այնքան հեշտ, ինչպես հայելու արտացոլանքը. այդ պատճառով էլ տղամարդը դժվար է ճանաչում կնոջը, եթե տարիները փոփոխել են նրա դեմքի լույսի խաղն ու շողքը, եթե հագուստները նոր կաղապար են ստեղծել նրա համար: Իրականում իմաստուն է նա, ով տրվում է ճակատագրին: Բայց ես շատ երիտասարդ էի, և քո մոռացկոտությունը ինձ անհասկանալի էր թվում, մանավանդ որ անդադար մտածելով քո մասին՝ ես ինձ համակում էի մտքերով, որ դու հաճախ ես հիշում իմ մասին ու սպասում ես ինձ. ինչպե՞ս կարող էի ես ապրել, կարծելով, որ քեզ համար ոչինչ եմ, որ նույնիսկ թուուցիկ հիշողությունն իմ մասին չի անհանգստացնում քեզ: Քո հայացքի ներքո արթնացած իրականության զգացողությունը ցույց տվեց ինձ, որ ոչինչ էլ չհիշեցիր իմ մասին, որ ոչ մի, նույնիսկ հիշողության ամենաբարակ թել չձգվեց քո կյանքից դեպի իմը. սա առաջին դաժան հարվածն էր, ճակատագրիս առաջին կանխազգացումը:

Դու չճանաչեցիր ինձ այդ անգամ և հետո՝ երկու օր անց՝ նոր հանդիպման ժամանակ, դու նայեցիր ինձ համարյա ինչպես անձանոթուհու ու նորից իմ մեջ չճանաչեցիր քեզ սիրողին, այլ տեսար միայն տասնութամյա սիրունիկ աղջկա, որը հանդիպել էր քեզ նույն տեղում երկու օր առաջ: Դու նայեցիր ինձ զարմանալիորեն բարեհամբույր, ու թեթև ժպիտ խաղաց շուրթերիդ: Դու նորից անցար կողքովս, և ինչպես նախորդ անգամ, դանդաղեցրիր քայլերդ. ես դողում էի, ես հրճվում էի, ես աղոթում էի, որ գոնե խոսեիր ինձ հետ: Ես հասկացա, որ քեզ համար առաջին անգամ կենդանի էակ եմ. ես նույնպես դանդաղեցրի քայլերս, ես չփախա քեզնից: Եվ հանկարծ զգացի, որ դու հետևիցս ես գալիս. առանց շրջվելու ես արդեն գիտեի, որ կլսեմ իմ ամենասիրելի ձայնը, և դու առաջին անգամ դիմեցիր ինձ: Ես քարացել էի սպասումից, սիրտս այնպես էր խփում, որ քիչ էր մնում կանգ առնել, բայց դու արդեն հասել էիր ինձ: Դու խոսեցիր ինձ հետ քո անսովոր թեթևությամբ ու ուրախությամբ, ասես մենք հին ծանոթներ էինք, ա՛խ, այո՛, դու ոչինչ չգիտեիր, դու երբեք ոչինչ չգիտեիր իմ կյանքի մասին. այնպիսի գայթակղիչ թեթևությամբ խոսեցիր ինձ հետ, որ ես նույնիսկ ուժ գտա իմ մեջ պատասխանելու քեզ: Մենք հասանք անկյունին, հետո դու հարցրիր. «Չընթրե՞նք միասին»: Ես պատասխանեցի՝ այո՛: Ինչպե՞ս կհամարձակվեի քեզ մերժել:

Մենք երկուսով ճաշեցինք մի փոքրիկ ռեստորանում. հիշու՞մ ես՝ որտեղ էր այն: Ա՛խ, ո՛չ, դու հավանաբար չես կարողանում տարբերակել այդ երեկոն մյուս նմանատիպ երեկոներից, և ո՞վ էի ես քեզ համար: Հարյուրից մեկը, պատահական

արկած, անվերջ շղթայի մի շրջանակ: Եվ ի՞նչը պետք է հիշեցնենք քեզ իմ մասին: Ես համարյա չէի խոսում, մեծ երջանկություն էր քո դիմաց նստելն ու ձայնդ լսելը: Ես վախենում էի հարց տալուց, ավելորդ բառ ասելուց, որպեսզի չկորցնեմ ոչ մի թանկարժեք վայրկյան: Ես միշտ շնորհակալությամբ հիշում եմ, թե ինչ լիարժեքությամբ դու արդարացրիր իմ սպասումները, որքան նրբազգաց էիր դու, ինչ սովորական ու բնական, առանց որևէ կաշունության, առանց փորձելու բարեհամբույր թվալ, առաջին իսկ ընդունելից դու խոսում էիր ինձ հետ ընկերական, և հենց միայն դրանով էլ կգրավելիր ինձ, եթե արդեն վաղուց ամեն ինչով ես քոնը չլինեի: Ա՛հ, դու չգիտես, ինչպիսի մեծ երազանք ես կատարել՝ արդարացնելով իմ հինգ տարվա սպասումը:

Արդեն ուշ էր, երբ մենք վեր կացանք սեղանի մոտից: Ռեստորանից դուրս գալիս դու հարցրիր ինձ՝ շտապո՞ւմ եմ արդյոք ես, թե՞ դեռ ժամանակ ունեմ: Կարո՞ղ էի արդյոք թաքցնել քեզանից քո հետևից գնալու պատրաստակամությունս: Ես ասացի, որ դեռ ժամանակ ունեմ: Դու հարցրիր՝ չե՞մ գա ներս՝ մի քիչ էլ գրուցելու:

-Մեծ հաճույքով,- տրվելով անմիջական զգացմունքներիս՝ ասացի ես և նկատեցի, որ շտապ պատասխանս ոչ այն է անհանգստացրեց, ոչ այն է ուրախացրեց քեզ, բայց հաստատ զարմացրեց: Հիմա ես հասկանում եմ քո զարմանքը. ես գիտեմ, որ կանայք սովորաբար թաքցնում են տրվելու պատրաստակամությունը, նույնիսկ եթե թաքուն այրվում են ցանկությունից, խաղում են վախ կամ ընդվզում և տեղի են տալիս միայն համառ խնդրանքներից, հավաստիքներից, երդումներից ու սուտ խոստումներից հետո: Ես գիտեմ, որ գուցե միայն նրանք, ում համար սերը արհեստ է, միայն անառականներն են պատասխանում միանգամից՝ համաձայնելով նման հրավերին, կամ էլ շատ երիտասարդները, ընդհանրապես անփորձ աղջիկները: Բայց իմ պատասխանի մեջ (ինչպե՞ս դու կարող էիր կասկածել) կար բառի փոխակերպված համառ կամք, հարյուրավոր օրերի տանջող կարոտի անսպասելի հորդում: Այսպես կամ այնպես դու հիացած էիր, ես հետաքրքրեցի քեզ: Ես նկատեցի, որ դու հիացմունքով նայում ես ինձ: Քո անսխալ հոտառությունը, մարդկության մասին քո ողջ գիտելիքները քեզ հուշեցին, որ ինչ-որ գաղտնիք է պահված այդ գեղեցկատես, միամիտ աղջկա մեջ: Քո մեջ հետաքրքրություն արթնացավ, և քո զգույշ հարցերից ես հասկացա, որ դու փորձում ես բացահայտել այդ գաղտնիքը: Բայց ես խուսափում էի ճշգրիտ պատասխաններից, ես գերադասում էի հիմար թվալ, քան գաղտնիքս բացահայտել:

Մենք բարձրացանք քո բնակարան: Ների՛ր, սիրելի՛ս, եթե ասեմ, որ դու չես կարող հասկանալ այն հուզմունքը, որով ես մտա շքամուտք, բարձրացա աստիճաններով. Ի՞նչ հիանալի, տառապալի, ինքնամոռաց, համարյա մահացու երջանկություն էր այդ ինձ համար: Ինձ հիմա էլ դժվար է առանց արցունքների հիշել այդ մասին, իսկ ես էլ արցունքներ չունեմ: Բայց դու մտածիր, որ այնտեղ ամեն ինչ իմ կրքոտ սիրով էր լի, ամեն ինչ իմ մանկության խորհրդանիշն էր, իմ ցավի... շքամուտքը, որի առաջ ես հազար անգամ սպասել եմ քեզ, աստիճան, որտեղ ես ականջ էի դնում քո քայլերին, և որտեղ ես առաջին անգամ տեսա քեզ, դռան վրայի անցքը, որտեղից ես հետևում էի քեզ, երբ ամբողջ հոգով ձգտում էի դեպի քեզ, քո դռան առջևի գորգը, որի վրա ես մի անգամ ծնկի եմ իջել: Որքան անգամ եմ ցատկել տեղիցս բանալու շրխկոցից: Ողջ մանկությունս, իմ ողջ սերը բնավորվել էին այս փոքրիկ ու վեղ տարածության մեջ, և հիմա այդ ամենը փոթորկի պես թափվեց ինձ վրա. չէ՞ որ ամեն ինչ կատարվեց, և ես քեզ հետ գնում էի, քեզ հետ, քո տան միջով, մեր տան միջով: Մտածի՛ր (հասարակ է հնչում, բայց ես ուրիշ կերպ չեմ կարողանում խոսել), ամբողջ կյանքը ինձ համար, ընդհուպ մինչև քո դուռը, իրականություն էր, հիմար առօրյա, իսկ դրանից այն կողմ սկսվում էր երեխայի կախարդական թագավորությունը, Ալադինի արքայությունը, մտածի՛ր, ես հազար անգամ կրակոտ աչքերով նայել եմ այս դռանը, որից ներս մտա այժմ, դու զգացիր, (միայն զգացիր, բայց երբեք չես հասկանա մինչև վերջ, սիրելի՛ս), թե ինչ էր իմ կյանքում այդ անկրկնելի վայրկյանը:

Ես քեզ մետ մնացի ողջ գիշեր: Դու չէիր էլ կասկածում, որ նախքան քեզ ոչ մի տղամարդ չէր դիպել ինձ և չէր տեսել իմ մարմինը: Եվ ինչպես իմանայիր այդ, սիրելի՛ս, ես չէի դիմադրում քեզ, ես խեղդել էի իմ մեջ ամոթի զգացումը, միայն թե դու չբացահայտեիր իմ սիրո գաղտնիքը, քանի որ այն գուցե վախեցնեիր քեզ, որովհետև դու սիրում ես ամեն թեթև բան, թռուցիկ, անցողիկ, դու վախենում ես խառնվել ինչ-որ մեկի ճակատագրի մեջ: Դու քեզ մաշում ես, քեզ նվիրաբերում ես աշխարհին ու զոհեր չես ուզում: Եթե ես հիմա քեզ ասում եմ, սիրելի՛ս, որ առաջինը քեզ եմ տրվել, ուրեմն աղաչում եմ՝ ինձ սխալ չհասկանաս: Ես չեմ մեղադրում քեզ, դու ինձ ծուղակը չես գցել, չես խաբել, չես զայթակեցրել, ես ինքս եմ եկել քեզ մոտ, գիրկդ եմ ընկել, վազել եմ դեպի իմ ճակատագիրը: Երբե՛ք, երբե՛ք չեմ մեղադրի քեզ. ո՛չ, ես միշտ շնորհակալ կլինեմ, որովհետև այնքա՛ն հարուստ, այնքա՛ն երջանիկ, վեհությամբ լի էր այդ գիշերն ինձ համար: Երբ մթության մեջ ես բաց էի անում աչքերս և զգում էի, որ կողքիս ես, ես զարմանում էի, որ երկրի վրա եմ: Ո՛չ, ես երբեք որևէ բանի համար չեմ զղջացել, սիրելի՛ս, այդ ժամը ամեն ինչ

իր տեղը դրեց: Եվ ես հիշում եմ, որ լսելով քո քնած շնչառությունը, զգալով քեզ այդքան մոտ՝ ես մթության մեջ երջանկությունից արտասվում էի:

Առավոտյան ես շտապեցի հեռանալ: Ես պետք է ժամանակին հասնեի խանութ և բացի այդ՝ որոշել էի հեռանալ ավելի շուտ, քան սպասավորդ կգար. ես չէի ուզում, որ նա ինձ տեսներ: Երբ ես արդեն հագնված կանգնած էի քո առաջ, դու գրկեցիր ինձ ու երկար նայում էիր դեմքիս. հիշեցի՞ր ինձ, թե՞ ես գեղեցիկ թվացի քեզ, որովհետև երջանկություն էի շնչում: Հետո դու համբուրեցիր շուրթերս: Ես կամաց շրջվեցի դեպի դուռը: Դու հարցրիր ինձ.

-Ուզու՞մ ես վերցնել ծաղիկները:

Ես ասացի.

-Այո՛:

Դու հանեցիր չորս սպիտակ վարդ գրասեղանին դրված կապույտ ծաղկամանից (օ՛, ես գիտեի այդ ծաղկամանը դեռ այն ժամանակից, երբ երեխա լինելով՝ մտա քո բնակարան): Դու տվեցիր ինձ այդ վարդերը, և ես դեռ օրերով համբուրում էի դրանք:

Մենք պայմանավորվեցիք մեկ անգամ էլ հանդիպել: Ես եկա, և ամեն ինչ նորից հիասքանչ էր: Մի երրորդ գիշեր էլ նվիրեցիր ինձ: Հետո դու ասացիր, որ պետք է հեռանա (ա՛խ, ես մանկուց ատում եմ այդ քո ճանապարհորդությունները) և խոստացար ետ գալուն պես տեղեկացնել ինձ: Ես քեզ հասցես տվեցի. անունս ասել չէի ուզում: Ես պահպանում էի իմ գաղտնիքը: Դու նորից հրաժեշտին վարդեր տվեցիր ինձ, հրաժեշտի՛ն:

Ամեն օր՝ երկու ամիս շարունակ, ես դիմանում էի... ո՛չ, պետք չէ, կարիք չկա նկարագրելու բոլոր այդ տանջանքները, սպասումներն ու հուսահատությունը: Ես քեզ չեմ մեղադրում, ես քեզ սիրում եմ այնպիսին, ինչպիսին կաս՝ մոռացկոտ, անհավատարիմ, ես քեզ սիրում եմ այսպիսին, միայն այսպիսին, ինչպիսին դու միշտ էիր, ինչպիսին որ մնացել ես հիմա: Դու վաղուց վերադարձել էիր, ես տեսել էի այդ քո լուսավորված պատուհաններից, բայց ինձ չէիր գրում: Ես ոչ մի տող չունեմ քեզանից այս իմ վերջին բոպեին, ոչ մի տող նրանից, ում ես նվիրաբերել եմ ողջ կյանքս: Ես սպասում էի, սպասում էի երկարածիզ հուսահատությամբ: Բայց դու չկանչեցիր ինձ, չգրեցիր ոչ մի տող... ոչ մի տող:

Երեխասս երեկ մահացավ՝ նա նաև քո երեխան էր: Նա քո երեխան էր, սիրելի՛ս, այն երեք գիշերներից մեկի երեխան, երդվում եմ, և դու գիտես, որ մահվան շեմին չեն ստում: Նա մեր երեխան էր, երդվում եմ, որովհետև ոչ մի տղամարդ չի դիպել ինձ այն օրվանից, ինչ տրվեցի քեզ, մինչև այն պահը, երբ երեխայիս բա-

ժանեցին ինձանից: Մարմինս սուրբ էր թվում ինձ այն օրվանից, ինչ դու հավելի էիր ինձ: Ինչպե՞ս կարող էի ես ինձ կիսել քեզ, որ իմ ամեն ինչն էր, և ուրիշի՝ անցողիկ տղամարդու հետ: Նա մեր երեխան էր, սիրելի՛ս, իմ մեծ սիրո ու քո չգիտակցված նրբության երեխան, մեր երեխան, մեր որդին, մեր միակ փոքրիկը: Բայց դու կհարցնես ինձ՝ գուցե վախեցած կամ գուցե զարմացած, դու կհարցնես ինձ, սիրելի՛ս, ինչու եմ երկար տարիներ լռել մեր երեխայի մասին և ասում եմ նրա մասին միայն այսօր, երբ նա պառկած է այստեղ՝ մթության մեջ, հավերժ քնած, երբ նա շուտով կգնա ու էլ երբեք, երբեք չի վերադառնա: Բայց ինչպե՞ս ասելի քեզ: Դու ոչ մի դեպքում չէիր հավատա անծանոթ կնոջը, ակնթարթային հանդիպումների մասնակցին, երեք գիշերների պատահական ընկերուհուն, որն առանց դիմադրության, առաջին իսկ խոսքիցդ տրվեց քեզ, չէիր հավատա, որ ես քեզ հավատարիմ եմ մնացել, քեզ՝ դավաճանիդ, և միայն կասկածամտությամբ կհամարեիր այդ երեխային քոնը: Երբեք, եթե նույնիսկ իմ խոսքերը քեզ ճշմարտանման թվային, երբեք չէիր ազատվի գաղտնի մտքից, որ ես փորձում եմ հարուստ մարդու վզին փաթաթել ուրիշի երեխային: Դու կասկածամտությամբ կվերաբերվեիր ինձ, և մեր մեջ ստվեր կմնար՝ անվստահության մութ, անբռնազբոս ստվեր: Ես այդ չէի ուզում: Եվ հետո, ես քեզ գիտեի, գիտեի քեզ այնպես, ինչպես նույնիսկ ինքդ քեզ չգիտես, և հասկանում էի, որ դու՝ անհոգություն, թեթևություն, խաղ սիրողդ, դժվար թե պատրաստ լինեիր հայր դառնալու և դառնալու մեկի ճակատագրի պատասխանատուն: Դու, որ սովոր ես լիարժեք ազատության, քեզ ինչ-որ կերպ ինձ կապված կզգայիր: Եվ դու, ես գիտեմ, քո կամքից անկախ, կատեիր ինձ, որ կապել եմ քեզ: Գուցե մի ժամով կամ էլ մի քանի րոպեով ես քեզ բեռ կթվայի, ատելի կթվայի. իսկ ես իմ հպարտությամբ ցանկանում էի որ դու ամբողջ կյանքում մտածեիր իմ մասին առանց տազնապի: Ես գերադասեցի ամեն ինչ վերցնել ինձ վրա, քան թե քեզ բեռ դառնալ, ես ցանկանում էի միակը դառնալ քեզ սիրող կանանցից, ում մասին դու սիրով ու շնորհակալությամբ կհիշես: Բայց, ցավոք, դու երբեք էլ չես մտածել իմ մասին, դու մոռացել ես ինձ:

Ես քեզ չեմ մեղադրում, սիրելի՛ս, ո՛չ, ես քեզ չեմ մեղադրում: Ների՛ր ինձ, որ մի կաթիլ ցավ կաթեց այս տողերին. իմ փոքրիկը, մեր երեխան մահացած պառկած է իմ կողքին, ես բռունցք արած ձեռքովս սպառնացել եմ Աստծուն և նրան մարդասպան անվանել, մտքերս խառնվում են: Ների՛ր խղճուկ վիճակս, ների՛ր ինձ: Ես գիտեմ՝ դու հոգուդ խորքում բարի ես ու հասկացող, դու յուրաքանչյուրին օգնում ես, օգնում ես անծանոթ մարդկանց, բոլորին, ովքեր դիմում են քեզ: Քո բարությունը յուրահատուկ է. այն բաց է բոլորի համար, և յուրաքանչյուրը կարող

է վերցնել այնքան, ինչքան կտեղավորվի ձեռքերի մեջ, բայց, ների՛ր ինձ, այն ալարկոտ է, այն սպասում է հիշեցման, խնդրանքի: Դու օգնում ես, երբ քեզ կանչում են, օգնում ես ամոթից, թուլությունից, բայց ոչ երբեք օգնելու ցանկությունից: Դու, թույլ տուր անկեղծ ասել, մարդ ես կարիքի ու ցավի համար, սիրում ես քիչ: Իսկ քեզ նման մարդկանց, նույնիսկ ամենաբարիներին դժվար է խնդրել: Մի անգամ, երբ ես դեռ երեխա էի, դռան անցքից տեսա դու ինչպես ողորմություն տվեցիր մուրացկանին, որը բախեց: Դու նրան փող տվեցիր, մինչ նա հասցրեց խնդրել, և շատ փող տվեցիր, բայց դու այդ արեցիր մի քիչ վախեցած ու արագ՝ նրանից արագ ազատվելու հստակ ցանկությամբ: Եվ թվաց, թե դու վախենում ես նայել նրա աչքերի մեջ: Ես ընդմիշտ հիշեցի, թե որքան հապշտապ ու շփոթված, շնորհակալությունից խուսափելով դու օգնեցիր այդ մուրացկանին: Ահա թե ինչու ես երբեք չեմ դիմել քեզ: Իհարկե, ես գիտեի, որ դու կօգնեիր ինձ, նույնիսկ հաստատ չիմանալով, որ նա քո երեխան է, դու ինձ փող կտայիր, շա՛տ փող, բայց այդ ամենը ինձանից արագ ազատվելու համար: Ես նույնիսկ մտածել եմ, որ դու ինձ կհամոզեիր ազատվել երեխայից: Ա՛յ դրանից էի ես ամենաշատը վախենում, որովհետև ինչեր ասես որ չէի անի ես, եթե միայն դու կամենայիր. ինչպե՛ս կարող էի մերժել քեզ: Բայց այդ երեխան ինձ համար ամեն ինչ էր. չէ՞ որ այն քեզանից էր, քո կրկնությունն էր, բայց միևնույն է դու չէիր. նա երջանիկ էր ու անհոգ, ում ես չէի կարողանում պահել, իսկ դու՝ ինձ մինչ ի մահ նվիրաբերվածդ (այդպես ես կարծում էի), դու իմ մարմնի մեջ բանտարկված էիր, իմ կյանքից անքակտելի: Հիմա ես վերջապես ձեռք բերեցի քեզ, ես կարող էի զգալ քեզ իմ ողջ էությամբ, կարող էի զգալ, թե ինչպես է իմ մեջ մեծանում քո կյանքը, կարող էի կերակրել, ջուր տալ, շոյել, համբուրել քեզ, երբ քնքշության ծարավից այրվում էր սիրտս: Ահա թե ինչու, սիրելի՛ս, ես այդքան երջանիկ էի՝ իմանալով, որ կրում եմ քո երեխային: Ահա թե ինչու ես թաքցնում էի քեզանից, այժմ դու չէիր կարող ազատվել ինձանից:

Սիրելի՛ս, ես ոչ միայն երջանկության ամիսներ եմ ապրել, որոնք նկարում էի երազանքներիս մեջ, այլ նաև տանջանքի ու տառապանքի ամիսներ, որ ինձ համար ճակատագիրն էր նախասահմանել: Ինձ հեշտ չէր: Վերջին ամիսներին ես էլ խանութ չէի կարողանում գնալ, քանի որ բարեկամներս կնկատեին իմ վիճակը և մորս կտեղեկացնեին: Մորիցս գումար խնդրել չէի ուզում և ապրում էի՝ ինձ մոտ մնացած ինչ-որ թանկարժեք իրեր վաճառելով: Ծննդաբերությունից մի շաբաթ առաջ պահարանիցս գողացել էին դրամներս, ու ես ստիպված էի որբերի ծնարանը գնալ: Այնտեղ գալիս էին միայն ամենաաղքատները, ամենաթշվառներն ու մոռացվածները, այնտեղ՝ աղքատության փոսում, ծնվեց քո երեխան: Ծնարանը

սարսափելի էր, ինձ անսահման խորթ էր, ու մենք, միայնակ պառկած այնտեղ, իրար օտար էինք ու ատում էինք իրար. միայն ընդհանուր դժբախտությունը, ընդհանուր տանջանքը բերել էր մեզ բոլորիս այդ հեղձուցիչ, քլորոֆիլով ու արյունով, գոռոցներով ու տնքոցներով լի սենյակը: Բոլոր նվաստացումները, որոնք կարող էր մարդը կրել... Այնտեղ նրանք խեղդեցին իմ մեջ ամոթը, բարոյականությունը, ու ֆիզիկականապես տանջվում էի ես այնտեղ պոռնիկների հետ հավասար: Ես տառապում էի նրանց հետ ստիպված շփումից, երիտասարդ բժիշկների ցինիզմից, որոնք ծիծաղում էին, ծածկոցը մի կողմ էին քաշում կեղծ գիտնականի հայացքով ու ձեռք էին տալիս անպաշտպան կանանց. Օ՛, այնտեղ մարդկային ամոթը հաղթահարում են հայացքներով ու ճնշում են խոսքերով:

Անունով պիտակ, ահա այն ամենը, ինչ մնացել է քեզանից, իսկ նա, որ պառկած է անկողնու վրա, ուղղակի հոտած մսի կտոր է, առարկա, որը ցուցադրության է հանվել ուսումնասիրությունների համար. այո՛, կանայք, որոնք իրենց իսկ տանը երեխա են պարգևում իրենց սիրելի ամուսիններին, չգիտեն, թե ինչ է նշանակում միայնակ, անպաշտպան ծննդաբերությունը: Եվ նունիսկ հիմա, երբ ես գրքում հանդիպում եմ «դժոխք» բառին, ակամայից հիշում եմ այդ հառաչներով, անզուսպ գոռոցներով ու կոպիտ ծիծաղով սենյակը:

Ների՛ր, ների՛ր ինձ, որ այդ մասին խոսում եմ: Բայց ես այդ առաջին ու վերջին անգամ եմ անում. էլ երբե՛ք, երբե՛ք չեմ խոսի այդ մասին: Ես տասնմեկ տարի լռել եմ և շուտով ընդմիշտ կլռեմ, բայց թեկուզ մեկ անգամ ես պետք է հագուրդ տամ ցանկություններիս, պետք է գոռամ, թե ինչ գնով է տրվել ինձ այս երեխան, որն իմ կյանքի երջանկությունն էր, և հիմա նա անշնչացած ընկած է անկողնու վրա: Ես վաղուց արդեն այդ ամենի մասին մոռացել էի. այն կորել էր երեխայիս ժպիտի մեջ, նրա ծիծաղի մեջ, իմ երջանկության մեջ, բայց հիմա, երբ նա մահացել է, ցավը նորից կենդանանում է, և ես չեմ կարող չգոռալ, ես պետք է հոգիս հանգստացնեմ թեկուզ մեկ անգամ: Բայց ես քե՛զ չեմ մեղադրում, այլ Աստծուն, որն իմ կրած ցավն անիմաստ դարձրեց: Երդվում եմ, ես քեզ չեմ մեղադրում, և երբեք, նույնիսկ կատաղության պահերին ես չեմ ընդվզել քո դեմ: Նույնիսկ այն ժամանակ, երբ մարմինս քրքրվում էր ծննդաբերության ժամանակ, նույնիսկ այն ժամանակ, երբ ցավը հոգիս խարխլում էր, ես Աստծո առաջ քեզ չեմ մեղադրել, երբեք չեմ փոշմանել այն գիշերների համար, երբեք չեմ անիծել սերս քո հանդեպ. ես միշտ սիրել եմ քեզ, միշտ օրհնել եմ մեր հանդիպումը: Եվ եթե նույնիսկ կրկնվեին ծնարանի այն սարսափելի րոպեները, և ես նախօրոք իմանայի՛ ինչ է ինձ սպասում, էլի կանցնեի այդ ամենի միջով, սիրելի՛ս, էլի հազար անգամ կանցնեի:

Մեր երեխան երեկ մահացավ. դու չգիտեիր նրան: Երբե՛ք, նույնիսկ ակնթարթային, պատահական հանդիպման ժամանակ քո հայացքը չսահեց փոքրիկ, ծաղկուն արարածի դեմքի վրայով, որը քեզանից էր ծնվել: Ես երկար թաքնվում էի քեզանից, բայց հիմա, երբ ես երեխա ունեի, ինձ թվում է՝ արդեն քեզ ավելի հանգիստ սիրով էի սիրում, համենայնդեպս այն արդեն ինձ անտանելի ցավ չէր պատճառում: Ես չէի ուզում ինձ կիսել քո ու որդուս մեջ, և ես տրվեցի ոչ քեզ՝ երջանկությունից փչացածիդ, այլ երեխայիս, որին ես պետք էի, որին պետք է կերակրեի, որին կարող էի համբուրել և սեղմել կրծքիս: Ես կարծես ազատվել էի անեծքից, որն ինձ դատապարտել էր ընդմիշտ կրքի առ քեզ, այն ժամանակից, երբ աշխարհում հայտվեց ուրիշ «դու», իրականում ինձ պատկանող «դու», շատ հազվադեպ էի ես մոտենում քո բնակարանին: Բայց քո ծննդյան օրերին տարեցտարի ես քեզ ուղարկում էի սպիտակ ծաղիկներ ճիշտ այնպիսին, ինչպիսին դու ինձ նվիրեցիր այն ժամանակ՝ մեր առաջին ու վերջին գիշերներից հետո: Այս տասը-տասնմեկ տարիների ընթացքում հարցրե՛լ ես երբևէ ինքդ քեզ՝ ով է քեզ ուղարկում վարդեր: Գուցե հիշե՛լ ես նրան, ում դու վարդեր ես նվիրել: Ես չգիտեմ ու երբեք էլ չեմ իմանա պատասխանդ: Ես ուզում էի տարին մեկ անգամ խավարից ուղղել դրանք քեզ, վերակենդանացնել այդ օրերի հիշողությունը. ավելին պետք չէր:

Դու չգիտեիր մեր խեղճ փոքրիկին. այսօր ես զոջում եմ, որ նրան թաքցրել եմ քեզանից, որովհետև դու կսիրեիր նրան: Դու չգիտեիր մեր երեխային, դու երբեք չես տեսել՝ ինչպես է նա ժպտում և լայն բաց անում իր սև, մտածկոտ աչքերը՝ քո աչքերը՝ լույս սփռելով իմ ու աշխարհի վրա: Ա՛հ, նա այնքա՛ն ուրախ էր, այնքա՛ն լավր: Նրա մեջ քո առույգությունն էր, քո նպատակասլացությունը, հիանալի երևակայությունը: Նա կարող էր ժամերով խաղալ ինչ-որ բանով, ինչպես դու ես խաղում կյանքի հետ, իսկ հետո երկար նստել գրքերի առաջ՝ կենտրոնացած խոժոռելով դեմքը: Նա ավելի ու ավելի էր նմանվում քեզ: Նրա մեջ արդեն սկսել էր ի հայտ գալ քեզ հատուկ երկակիությունը, լրջության ու թեթևամտության խառնուրդը, և որքան ավելի նման էր դառնում նա քեզ, այնքան ավելի շատ էի ես նրան սիրում: Նա լավ էր սովորում, չաչանակի պես խոսում էր ֆրանսերեն, նրա տետրերը ամենամաքուրն էին դասարանում, և ի՛նչ գեղեցիկ էր նա իր կոստյումով և սպիտակ գծավոր վերարկուով: Նա միշտ ամենահիասքանչն էր, որտեղ էլ որ լիներ. երբ ես Գրադոյում զբոսնում էի ծովափին, կանայք կանգ էին առնում ու շոյում էին նրա երկար դեղին վարսերը, երբ նա Ջեմմերինգում դահուկ էր քշում, մարդիկ հիացմունքով նայում էին նրան: Նա այնքան գեղեցիկ էր, այնքան նուրբ ու մեղմ: Անցած տարի նա ընդունվեց քոլեջ և կրում էր իր համազգեստն ու փոքրիկ սուրը,

որոնցով այնքան նմանվում էր տասնութերորդ դարի ասպետներին: Հիմա նա հագին մի վերնաշապիկ ունի, և նա պառկած է, խեղճ, կապտած շուրթերով, և ձեռքերը ծալված են կրծքին: Բայց դու գուցե հարցնես՝ ինչպես կարող էի ես դաստիարակել երեխա շքեղության մեջ, ինչպես կարողացա նրան բարձրաշխարհիկ կյանքի բոլոր բարիքները պարզել: Սիրելի՛ս, ես խոսում եմ քեզ հետ խավարի միջից, ես չեմ ամաչում, ես կասեմ, միայն թե չվախենաս, սիրելի՛ս. ես ինձ վաճառում էի: Ես չդարձա փողոցային թիթեռնիկ, պոռնիկ, բայց ես ինձ վաճառում էի: Ես հարուստ ընկերներ ունեի, հարուստ սիրելեաններ: Սկզբում ես էի նրանց փնտրում, հետո նրանք էին ինձ փնտրում, որովհետև ես (նկատե՛լ ես) գեղեցիկ էի: Բոլորը, ում ես տրվում էի, շնորհակալ էին ինձ, բոլորը սիրում էին ինձ, միայն դու չսիրեցիր, միայն դու, սիրելի՛ս:

Չզվու՛մ ես դու հիմա ինձանից այս խոստովանությունից հետո: Ո՛չ, ես գիտեմ, դու չես ասում ինձ, ես գիտեմ, դու ամեն ինչ հասկանում ես, կհասկանաս նաև, որ ես այդպես էի վարվում քեզ համար, քո երկրորդ «ես»-ի համար, քո երեխայի համար: Մի անգամ ծնարանի սենյակում ես բախվեցի աղքատության սարսափներին, ես գիտեի, որ աղքատին բոլորը տրորում են, ստորացնում, որ այս աշխարհում նա միշտ զոհ է, և ես ոչ մի դեպքում չէի ուզենա, որ քո երեխան, քո լուսավոր, հիասքանչ փոքրիկը մեծանար սովի մեջ, կեղտոտ փողոցներում, հեղձուցիչ գարշահոտության մեջ: Ես չէի ուզում, որ նրա նուրբ շուրթերը կոպիտ բառեր արտասանեին, որ նրա սպիտակ մարմնին դիպչեր կոպիտ, աղքատություն մատնանշող սպիտակեղեն: Քո երեխան պետք է ամեն ինչ ունենար, ամեն հարստություն, ամեն բարիքներն աշխարհի, նա պետք է բարձրանար քեզ մոտ, մինչև քո ապրելակերպը:

Այդ պատճառով, միայն այդ պատճառով, սիրելի՛ս, ես վաճառում էի ինձ: Ես ոչինչ չէի զոհաբերում, որովհետև այն, ինչը կոչվում է պատիվ կամ խայտառակություն, ինձ համար նշանակություն չունեի, դու չէիր սիրում ինձ, դու միակը, ում իրականում մարմինս պատկանում էր, իսկ մյուսների հանդեպ ես անտարբեր էի: Տղամարդկանց քնքշանքները և նույնիսկ անկեղծ զգացմունքները իմ մեջ արձագանք չէին գտնում, չնայած որ ես հարգում էի նրանց և հոգուս խորքում խղճում էի՝ իմանալով, թե ինչ է անպատասխան սերը: Բոլոր նրանք, ում ես գիտեի, բարի էին իմ հանդեպ, բոլորն ինձ երես էին տալիս, հարգում էին: Մի կոմս՝ ծեր այրի, սիրում էր ինձ հարազատ աղջկա պես, այդ նա ճանապարհ հարթեց խեղճ երեխայիս, քո երեխայի համար դեպի քուլեջ: Երեք-չորս անգամ նա ձեռքս է խնդրել, ես հիմա կոմսուհի կարող էի լինել՝ հեքիաթային դղյակի տիրուհի, կարող էի թող-

նել հոգսերս, քանի որ երեխասս կունենար քնքուշ, հոգատար հայր, իսկ ես՝ հանգիստ, բարի ամուսին: Ես չհամաձայնեցի, չնայած որ ցավ էի պատճառում նրան: Գուցե սխալ վարվեցի, հիմա ես կարող էի հանգիստ ապրել, և իմ հիասքանչ փորրիկը ինձ հետ կլիներ, բայց ինչու՞ չխոստովանեմ քեզ: Ես չէի ուզում ինձ կապել, ուզում էի ամեն թույլ ազատ լինել քեզ համար: Հոգուս խորքում դեռ պահված էր մանկական երազանքս, որ դու կկանչես ինձ գոնե մեկ ժամով: Եվ հանուն այն մեկ հնարավոր ժամի ես վանում էի ինձանից ամեն ինչ, միայն թե ազատ լինեի և քո առաջին իսկ կանչով հայտնվեի: Ի՞նչ էր իմ ամբողջ կյանքը փոքրուց ի վեր. ոչ այլ ինչ, քան սպասում, քո գալստյան սպասում:

Եվ այդ ժամն իսկապես եկավ, բայց դու չգիտես այդ, չես կասկածում, սիրելի՛ս: Դու չճանաչեցիր ինձ այս անգամ էլ. երբե՛ք, երբե՛ք ինձ չես ճանաչել: Ես այն ժամանակ էլ հաճախ էի հանդիպում քեզ թատրոնում, համերգների ժամանակ, փողոցում. ամեն անգամ սիրտս քարանում էր, բայց դու չէիր նայում ինձ վրա, ես արտաքնապես փոխվել եմ՝ հիմար դեռահասից վերածվել եմ կնոջ (ասում էին, որ ես գեղեցիկ եմ, ես միշտ շքեղ էի հագնվում և միշտ շրջապատված էի երկրպագուներով): Ինչպես կարող էիր դու տեսնել իմ մեջ հիմար աղջնակի, ում տեսել ես ննջասենյակիդ կիսամութում: Երբեմն քեզ հետ զրույցի էին բռնվում իմ երկրպագուները, դու պատասխանում էիր նրանց ու հայացք էիր նետում ինձ վրա, բայց այդ սառը հայացքը միայն քաղաքավարության նշան էր, թույլական հետաքրքրության հայացք էր. ինձ չիմացող, օտար, սարսափելի օտար հայացք էր: Հիշում եմ, մի անգամ այդ անճանաչելիությունը ինձ այրող ցավ պատճառեց. թատրոնում էր, ես նստած էի ընկերներիս հետ, իսկ դու՝ մեր կողքին: Սկսվեց ներկայացումը, լույսերը մարեցին, և ես էլ չէի կարողանում տեսնել դեմքդ, բայց ես շնչառությունդ էի զգում կողքիս, ինչպես այն ժամանակ, այն գիշեր, երբ մենք անկողին էինք կիսում: Եվ ես բռնկվեցի ցանկությամբ՝ կռանալու և համբուրելու այդ օտար ձեռքը, այդ սիրելի ձեռքը, որը մի ժամանակ շոյում էր ինձ:

Երաժշտության հնչյուններից անհանգստացած՝ ես հագիվ էի զսպում ինձ, որ շուրթերս չհպեմ ձեռքիդ, չտրվեմ խելագար պոռթկումին:

Առաջին գործողությունից հետո ես խնդրեցի ընկերոջս տանել ինձ: Ես էլ չէի կարողանում նստել քո կողքին՝ մթության մեջ, քեզ այդքան մոտ և այդքան հեռու: Բայց ժամը վրա հասավ, այն մեկ անգամ էլ վրա հասավ, վերջին անգամ իմ երկրային կյանքում: Այդ պատահեց մեկ տարի առաջ՝ քո ծննդյան օրվանից մեկ օր հետո: Եվ տարօրինակ է, ես ամբողջ օրը մտածում էի քո մասին, որովհետև քո ծննդյան օրը ես միշտ նշում էի որպես տոն: Վաղ, վաղ առավոտյան ես դուրս եկա

տնից, գնեցի սպիտակ վարդեր և, ինչպես միշտ, ուղարկեցի դրանք քեզ՝ որպես քո կողմից մոռացված ժամերի հիշողություն:

Յերեկը ես գնացի՝ որդուս հետ սահելու, հետո տարա նրան հրուշակեղենի խանութ, իսկ երեկոյան՝ թատրոն. ես ուզում էի, որ նա ոչ մի բան չկասկածի. մանկուց նա հիշում է այդ օրը՝ որպես մի գաղտնի տոն: Մյուս օրը՝ երեկոյան, ես համերգի էի իմ այդ ժամանակվա ընկերոջ հետ՝ երիտասարդ գործարանատիրոջ, ում հետ արդեն երկու տարի է, ինչ ապրում էի: Նա պաշտում էր ինձ, շրջապատել էր ինձ սիրով ու, ինչպես և ուրիշները, ուզում էր ամուսնանալ ինձ հետ, բայց իմ կողմից անմիտ թվացող մերժում էր ստանում, չնայած ինձ ու երեխայիս նվերներով էր շրջապատել: Նա ինքը արժանի մարդ էր, և նրա մի քիչ հիմար, բայց անմոռաց նվիրվածությունը ուրիշ պատասխանի էր արժանի: Համերգի ժամանակ մենք հանդիպեցինք ծանոթների և բոլորով միասին գնացինք ճաշելու Ռինգշտրասսե ռեստորանում, և ծիծաղից ու կատակներից հետո ես առաջարկեցի գնալ նաև պարասրահ՝ Տաբարեն: Սովորաբար, երբ ինձ կանչում էին այդպիսի վայրեր, ես հրաժարվում էի, որովհետև այնտեղ շատ աղմկոտ էր, արբշիռ ուրախություն էր տիրում այնտեղ, և այդ ամենն ինձ զզվելի էր թվում, բայց այս անգամ ինչ-որ աննկարագրելի, կախարդական ուժ ստիպեց ինձ արտահայտել իմ ցանկությունը, որը համաձայնության արժանացավ ընկերներիս կողմից: Ես ինքս չգիտեի՝ ինչն էր ինձ այդքան շատ ձգում այնտեղ, ասես ինչ-որ ոչ սովորական և անսպասելի մի բան էր սպասում այնտեղ: Իմ ընկերները, որոնք սովոր էին ամեն ինչում ինձ բավարարել, հենց այդ պահին վեր կացան, ու մենք ուղևորվեցինք Տաբարեն, այնտեղ շամպայն էինք խմում, և ինձ համակեց կատաղության աստիճանի հասնող տառապալից ուրախություն, ինչպիսին ես երբեք չեմ զգացել: Ես խմում ու խմում էի, ձայնակցում էի վուլգար երգերին, մի քիչ էլ, ու ես կգնայի պարելու կամ կսկսեի հռհռալ ամբողջ պարահրապարակով մեկ: Բայց հանկարծ ասես ապակե սառնությամբ կամ կրակի տաքությամբ լցվեց սիրտս. ես քեզ տեսա: Դու ընկերներիդ հետ նստած էիր հարևան սեղանի մոտ ու նայում էիր ինձ հիացած ու ցանկությամբ լի հայացքով, այն հայացքով, որը միշտ թափանցում էր էությանս խորքը: Առաջին անգամ տասը տարվա մեջ դու նորից նայեցիր ինձ քեզ հատուկ անպատասխանատու կրքի ողջ ուժով: Ես ամբողջովին դողում էի և բարձրացրա՞ծս բաժակը հազիվ պահեցի ձեռքումս:

Բարեբախտաբար իմ սեղանի շուրջ նստածներից և ոչ մեկը չնկատեց իմ շփոթմունքը. այն կորավ ծիծաղի ու երաժշտության մեջ:

Քո հայացքը ավելի ու ավելի համառ էր դառնում, ավելի կրակոտ, այն վառում էր ինձ կրակով: Ես ջանում էի հասկանալ՝ ճանաչեցի՞ր ինձ, թե՛ ոչ, թե՛ ես քեզ համար նորից նոր, ուրիշ, օտար կի՞ն եմ: Արյունս բարձրացավ այտերիս, ես շփոթված պատասխանում էի իմ ընկերների հարցերին: Դու չէիր կարող չնկատել, թե ինչքան անհանգստացրեց ինձ քո հայացքը: Հազիվ երևացող գլխի շարժումով դու ինձ նշան արեցիր, որ ես մի թուփով դուրս գամ շքամուտք: Հետո դու բարձր ձայնով հաշիվն ուզեցիր, հաջողություն մաղթեցիր ընկերներիդ և դուրս եկար՝ ևս մեկ անգամ ինձ նշան անելով, որ սպասելու ես: Ես դողում էի ասես տենդի մեջ, ես չէի կարողանում ոչ մի բառ արտասանել, չէի կարողանում ինձ համակած անհանգստությունը ճնշել: Հենց այդ վայրկյանին սևամորթ մի զույգ, բարձր կրունկներով դոփելով, սկսեց մի ժամանակակից պար պարել: Բոլորի հայացքներն ուղղվեցին նրանց կողմը, և օգտվելով առիթից՝ ես ասացի ընկերոջս, որ հիմա կգամ, ու դուրս եկա քո հետևից:

Դու կանգնած էիր շքամուտքում ու ինձ էիր սպասում. երբ ես մոտեցա քեզ, դեմքդ պայծառացավ: Ժպտալով ուշտապելով դու ինձ ընդառաջ եկար, ես միանգամից տեսա, որ դու չճանաչեցիր ինձ, չճանաչեցիր իմ մեջ ո՛չ դեռահասին, ո՛չ տարիներ առաջվա աղջնակին. դու նորից ձգտում էիր դեպի ինձ, ինչպես ինչ-որ նորության, անճանաչելի:

-Մի ժամ էլ ինձ չէի՞ք տրամադրի,-հարցրիր դու, և քո ինքնավստահ, անբռնազբոս ձայնից ես հասկացա, որ դու ինձ վերաբերվում ես որպես այն կանանցից մեկին, ում կարելի է մի երեկոյի համար գնել:

-Այո՛,- արտասանեցի ես նույն դողով, բայց այդ «այո՛»-ն այն նույն «այո՛»-ն, որը տասը տարի առաջ քեզ մի հիմար աղջնակ ասաց փողոցում:

-Ե՞րբ կարող եմք տեսնվել,- հարցրիր դու:

-Երբ կամենաք,- պատասխանեցի ես. ես քեզանից չէի ամաչում:

Դու զարմացած հայացքով նայեցիր ինձ այն նույն անվստահ հետաքրքրասիրությամբ, ինչպես և այն երեկո, երբ ես նույն կերպ զարմացրի քեզ շտապողակա-նությամբ, որով համաձայնեցի:

-Կարելի է և հիմա՞,- մի քիչ անվստահ հարցրիր դու:

-Այո՛,- պատասխանեցի ես,- գնացի՞նք:

Եվ արդեն ուղղվեցի կախիչի կողմը, որպեսզի վերցնեմ վերարկուս:

Հանկարծ հիշեցի, որ հագուստիս համարը ընկերոջս մոտ է մնացել: Վերադառնալ ու խնդրել համարը կնշանակել, որ երկար բացատրություններ պետք է տամ ու նաև մի ժամ զոհեմ, ժամ, որը ես կարող եմ անցկացնել քեզ հետ, ժամ,

որի մասին ես երազել եմ այդքան տարի: Ես դա չէի ուզում: Առանց տատանվելու ես դուրս եկա ու հայտնվեցի ցուրտ, խոնավ, մառախլապատ գիշերվա մեջ՝ չմտածելով թիկնոցիս մասին, չմտածելով բարի, սիրող մարդու մասին, ում հաշվին ես ապրում էի արդեն մի քանի տարի և ում ես ամենահիմար ու ստորացուցիչ վիճակի մեջ էի դրել. բոլորի աչքի առաջ նրա սիրեկանը, ում հետ նա երկու տարի ապրում էր, փախչում է առաջին պատահածի հետ: Օ՛, ես գիտակցում էի իմ արարքի ամբողջ անշնորհքությունը, անամոթությունը, ես հասկանում էի, որ անմիտ եմ վարվում և մի լավ մարդու, մի հավատարիմ ընկերոջ մահացու ցավ եմ պատճառում, հասկանում էի, որ վերջ եմ դնում հարուստ գոյությանս, բայց ի՞նչ իմաստ ունեւր ընկերությունը, հենց ինքը՝ կյանքը՝ համեմատած անդիմադրելի ցանկության, քո շուրթերը զգալու, բառերիդ քաղցրությունը լսելու հետ: Այդպես ես սիրում էի քեզ, հիմա ես կարող եմ պատմել սա քեզ, երբ ամեն ինչ անցել է: Ինձ թվում է, եթե դու ինձ կանչեիր դագաղից, ես ուժ կունենայի վեր կենալու ու հետևելու քեզ:

Մուտքի մոտ կանգնած էր կառքը, և մենք գնացինք քո բնակարան: Ես նորից լսեցի քո ձայնը, զգում էի քո ներկայությունը և նույնքան հարբած, նույնքան երեխայական երջանիկ էի ես, որքան մեր առաջին հանդիպման ժամանակ: Ես նորից բարձրանում էի աստիճաններով, առաջին անգամ ավելի քան տասը տարվա ընդմիջումից հետո: Ո՛չ, ո՛չ, ես չեմ կարող քեզ պատմել՝ ինչպես էի ես այդ վայրկյաններին ինձ երկատված զգում անցյալի ու ներկայի միջև, և ամեն ինչում նորից միայն քեզ էի զգում: Քո սենյակում քիչ բան էր փոխվել. մի քանի նկար, գիրք, կահույք էր ավելացել, և այդ ամենն այնքա՛ն ծանոթ էր ինձ: Իսկ գրասեղանին վարդերով ծաղկամանն էր՝ իմ վարդերով, որոնք ես քո ծննդյան առիթով էի ուղարկել քեզ՝ ի հիշատակ նրա, ում դու միևնույն է չես հիշել, չես ճանաչել, չես ճանաչում նաև հիմա, երբ նա քեզ հետ է, ու դուք կիսում եք նրա հետ մի ողջ անկողին: Միևնույն է, հաճելի էր տեսնել, որ դու պահում ես իմ ծաղիկները, որ քո շրջապատում իմ «ես»-ի մասնիկն է թափառում, իմ սիրո շունչը:

Դու գրկեցիր ինձ: Նորից ես քեզ մոտ մնացի մի երկար գիշեր: Բայց և այդ ժամանակ դու ինձ չճանաչեցիր: Երջանիկ լինելով՝ ես ընդունում էի քո քնքշանքները և տեսնում էի, որ քո կիրքը տարբերություն չի դնում սիրելի ու առնված կնոջ մեջ, որ դու տրվում ես քո ցանկություններին՝ քո բնավորության համաձայն: Դու այնքան մեղմ էիր ինձ հետ, այն կնոջ հետ, որը գիշերային ռեստորանից էր բերվել, այնքա՛ն ընկերական, հոգևոր ու ասպետական հարգանքով և միևնույն ժամանակ այնքա՛ն կրքոտ հաճույքների մեջ, որ ես, երջանկությունից արբած, ինչպես տասը տարի առաջ, նորից ամբողջ ուժով զգացի քո անկրկնելի երկակիությունը, սիրա-

յին կրքի մեջ ոգեշնչվածությունը, որը մի օր ինձ՝ կիսաերեխայիս գրավեց: Ես չեմ հանդիպել մի մարդու, որը այդքան կրքոտ նվիրվեր թուպին, որը այդքան մեծահոգությամբ բացեր իր հոգու թաքուն անկյունները, որպեսզի հետո, ցավոք, անսահման մոռացումի մատներ: Ես մոռացել էի իմ մասին, ո՞վ էի ես, այստեղ, մթության մեջ, քեզ մոտ: Կրքոտ նվիրված մի աղջնակ, կամ քո երեխայի մա՛յրը, կամ օտար մի կի՞ն ռեստորանից: ա՛խ, ամեն ինչ այնքա՛ն ծանոթ էր, արդեն ապրած և միևնույն ժամանակ այնքա՛ն արբեցուցիչ ու նոր այդ աստվածային օրվա մեջ: Եվ ես աղոթում էի, որ գիշերը չվերջանար:

Բայց առավոտը եկավ, մենք ուշ վեր կացանք, ու դու հրավիրեցիր ինձ՝ նախաճաշելու քեզ հետ: Մենք խմում էինք թեյ, որը պատրաստվել էր ճաշասենյակում ինչ-որ մեկի հոգատար ձեռքով: Դու նորից ինձ հետ սովորական էիր խոսում և ի սրտե՛ առանց անհամեստ հարցերի, առանց չնչին հետաքրքրասիրության: Դու ո՛չ հարցնում էիր, թե ով եմ ես, ո՛չ որտեղ եմ ապրում. ես քեզ համար միայն պատահական արկած էի, անանուն, թուպեական քմահաճույք, անհետ կորած հիշողությունից, ինչպես օդում արձակված կրակոց: Դու պատմեցիր ինձ, որ քեզ սպասում է մեծ ճանապարհորդություն դեպի հյուսիսային Աֆրիկա, որը կտևի երկու կամ երեք ամիս. ես վախից դողացի, երջանկությունը փոխարինվեց հուսահատությամբ, քանի որ ականջներումս նորից հնչեց. «Վե՛րջ, ամեն ինչ վերջացավ և մոռացվեց»: Ես ուզում էի ոտքերդ ընկնել և գոռալ. «Ինձ էլ վերցրու քեզ հետ, այդ ժամանակ դու կճանաչես ինձ վերջապես, վերջապես՝ այսքան տարի անց»: Բայց ես այնքան հպարտ, երեխայական, այնքան ստրկանման ենթարկվում էի քեզ: Ես միայն ասացի.

-Ի՞նչ ավստս:

Դու ժպտալով նայեցիր ինձ:

-Դու իրո՞ք ավստսում ես:

Ես չդիմացա, տրվեցի հանկարծակի պոռթկմանը: Ես վեր կացա ու երկար, տպավորիչ հայացքով նայեցի դեմքիդ: Հետո ասացի.

-Նա, ում ես սիրում էի, նույնպես միշտ հեռանում էր:

Ես նայեցի քեզ, նայեցի ուղիղ աչքերիդ մեջ. «Հիմա՛, հիմա՛ նա կճանաչի ինձ»: Ես սպասում էի՝ դողալով վախից ու հույսով: Բայց դու ժպտացիր և ասացիր՝ ասես սփոփելով.

-Ճամփորդություններից վերադառնում են, չէ՞:

-Այո՛,- ասացի ես,- վերադառնում են, բայց մոռացած:

Գուցե ձայնիս մեջ հնչեց ինչ-որ արտասովոր մի բան, չափազանց կրակոտ, որովհետև հիմա դու էլ վեր կացար ու նայեցիր ինձ հիացմունքով ու ջերմ մեղմությամբ: Դու ձեռքս բռնեցիր:

-Լավը չի մոռացվում. ես քեզ չեմ մոռանա,- ասացիր դու ու հայացքդ աչքերիս մեջ ընկղմեցիր, ասես ուզում էիր հիշողությանդ մեջ տպել իմ գոյությունը. ես մտածեցի, որ վերջապես փոշին մաքրվեց քո աչքերից. «Նա կճանաչի ինձ, կճանաչի ինձ»: Հոգիս վառվում էր այդ մտքից:

Բայց դու չճանաչեցիր ինձ: Ո՛չ, դու չճանաչեցիր ինձ, և երբեք ես այդքան օտար չէի քեզ, որովհետև ուրիշ կերպ ինչպե՞ս կարող էիր դու անել այն, ինչ մի քանի րոպե առաջ արեցի: Դու համբուրեցիր ինձ, մեկ անգամ էլ կրքոտ համբուրեցիր ինձ, այնպես, որ ես ստիպված էի նորից ուղղել մազերս: Եվ ահա, կանգնելով քո հայելու առաջ, ես հանկարծ տեսա (ես քիչ մնաց ընկնեի վախից ու ամոթից), ես տեսա, թե դու ինչպես պայուսակիս մեջ թաքուն դրեցիր երկու խոշոր դրամ: Ինչպես ես զսպեցի ինձ և չշրջվեցի ու հարվածեցի դեմքիդ. դու վճարում էիր այդ գիշերվա համար ինձ, ով մանկուց սիրում էր քեզ, քո երեխայի մորը: Ես քեզ համար միայն պոռնիկ էի Տաբարենից, ոչ ավելին, դու վճարեցիր ինձ, վճարեցիր: Բացի նրանից, որ դու մոռացել էիր ինձ, ես պետք է նաև նվաստացումների դիմանայի:

Ես սկսեցի արագորեն հավաքել իրերս: Միայն թե հեռանայի, արագ հեռանայի. չափազանց ցավալի էր: Ես վերցրի գլխարկս.այն գրասեղանի վրա էր՝ սպիտակ վարդերով ծաղկամանի կողքին, իմ վարդերի կողքին: Ինձ համակեց անհաղթահարելի, ուժեղ ցանկություն. ես որոշեցի մի փորձ էլ անել:

-Ինձ մի վարդ չե՞ս տա քո սպիտակ վարդերից:

-Մեծ հաճույքով,- պատասխանեցիր դու ու հենց այդ պահին ծաղկամանից վարդ հանեցիր:

-Բայց միգուցե քեզ դրանք մի կին է նվիրել, կին, որը քեզ սիրու՞մ է:

-Միգուցե,- ասացիր դու,- չգիտեմ: Դրանք ինձ են ուղարկվել չգիտեմ ում կողմից: Դրա համար էլ սիրում եմ դրանք:

Ես նայեցի քեզ:

-Միգուցե դրանք մի կնոջ կողմից են ուղարկված, ում դու մոռացել ես: Դու հիացած նայեցիր ինձ: Ես հստակ նայում էի աչքերիդ մեջ. «Ճանաչիր ինձ, ճանաչիր ինձ վերջապես», - գոռում էր հայացքս: Բայց քո հայացքը վառվում էր քնքշությամբ: Դու մեկ անգամ էլ համբուրեցիր ինձ: Բայց դու ինձ չճանաչեցիր: Ես արագ ուղղվեցի դեպի դուռը, որովհետև արցունքները պատրաստ էին թափ-

վելու աչքերիցս, իսկ դա դու չպետք է տեսնեիր: Ես այնպես էի վազում, որ շքամուտքում քիչ մնաց բախվելի սպասավորիդ: Նա մի կողմ ցատկեց, հարգալից բաց արեց դուռն ինձ համար և այդ ժամանակ, դու լսու՞մ ես, այդ ժամանակ, երբ ես արցունքների միջից նայեցի ծերուկին, նրա աչքերում ինչ-որ լույս առկայծեց: Այդ ժամանակ, լսու՞մ ես, այդ վայրկյանին Իոհաննը ճանաչեց ինձ, չնայած ոչ մի անգամ չէր տեսել ինձ մանկուց ի վեր: Ես ուզում էի ծնկի իջնել նրա առաջ և համբուրել նրա ձեռքերը, որովհետև նա ճանաչեց ինձ: Բայց ես միայն հանեցի պայուսակիցս այն ահավոր փողերը, որոնցով դու ինձ մեխել էիր ամոթանքի սյունին, և շարտեցի դրանք ծերուկին: Նա դողաց, վախեցած նայեց ինձ. այդ վայրկյանին նա գուցե ավելին հասկացավ իմ մասին, քան դու քո ամբողջ կյանքի ընթացքում: Բոլոր, բոլոր մարդիկ սիրում էին ինձ, բարի էին իմ հանդեպ, միայն դու, միայն դու չէիր հասկանում ինձ, միայն դու ոչ մի անգամ չճանաչեցիր ինձ:

Իմ երեխան մահացել է, մեր երեխան, հիմա ես էլ ոչ ոքի չունեմ, որ սիրեմ, բացի քեզանից: Բայց ո՞վ ես դու ինձ համար, դու՛ երբեք, երբեք ինձ չճանաչող, իմ կողքով անցնող, ինչպես թափանցիկ ջրի կողքով են անցնում, ինձ ոտնակոխ անող, ինչպես քարն են անում, դու՛ հավատարմորեն ինձ բաժանման մատնող և միշտ սպասումի մեջ պահող մեկը: Մի անգամ ինձ թվաց, որ ես պահել եմ քեզ՝ անորսալի մեկիդ, երեխայի մեջ: Բայց նա քո երեխան էր, նա դաժան լքեց ինձ ու գնաց ճամփորդության, նա մոռացավ ինձ և էլ երբեք չի վերադառնա: Ես նորից մենակ եմ, ինչպես երբեք, ես ոչինչ չունեմ, քեզանից ոչինչ չունեմ՝ ո՛չ երեխա, ո՛չ բառեր, ո՛չ տողեր, ո՛չ մի հիշողության նշաններ, և եթե դու լսեիր իմ անունը, այն քեզ ոչինչ չէր ասի: Ինչու՞ չերագեմ մահվան մասին, երբ մահացած եմ քեզ համար, ինչու՞ չհեռանամ, երբ դու հեռացել ես ինձանից: Ո՛չ, սիրելի՛ս, ես չեմ մեղադրում քեզ, ես չեմ ուզում իմ ցավը խցկել քո երջանիկ բնակարան: Մի՛ վախեցիր, ես էլ չեմ ձանձրացնի քեզ, ների՛ր ինձ, ես պետք է հոգիս հանգստացնեի երեխայիս մահվան ժամին:

Այս մի անգամ եմ պատմում քեզ, հետո ես նորից կկորչեմ մշուշի մեջ ու կլռեմ, ինչպես միշտ լռել եմ քո առաջ: Բայց դու չես լսի իմ հառաչը, քանի ես կենդանի եմ, միայն երբ կմեռնեմ, կստանաս դու այս կտակը, մի կնոջ կտակ, որը սիրում էր քեզ ավելի շատ, քան մնացած ամենը, և ում դու երբեք չճանաչեցիր, ով ամբողջ կյանքում սպասում էր քեզ ու քո կանչին: Գուցե դու կկանչես ինձ այն ժամանակ, երբ ես առաջին անգամ քեզ հավատարիմ չեմ լինի. ես չեմ լսի քեզ շիրիմից: Ես չեմ թողնի քեզ ո՛չ լուսանկար, ո՛չ հիշողության որևէ նշան, ինչպես և դու ինձ ոչինչ չթողեցիր, երբեք դու չես ճանաչի ինձ, իմ դեմքը: Ես մահանում եմ թեթև, որով-

հետև դու չես զգում մահս հեռվից: Եթե քեզ ցավեցներ մահս, ես չէի կարողանա մահանալ:

Ես էլ չեմ կարողանում գրել... գլխումս այնպիսի ծանրություն է տիրում... ամբողջ մարմինս ջարդվում է, ես տաքություն ունեմ... ինձ թվում է՝ հիմա ստիպված կլինեմ պառկել: Գուցե շուտով ամեն ինչ վերջանա, գուցե մեկ անգամ ճակատագիրը ներողամիտ գտնվի իմ հանդեպ, և ես չտեսնեմ, թե ինչպես են տանում երեսայիս մարմինը... Ես էլ չեմ կարողանում գրել... Հաջողություն, սիրելի՛ս, հաջողություն, շնորհակալ եմ քեզ: Այն ամենը, ինչ եղել է, չնայած ամեն ինչին, հիանալի էր... Ես շնորհակալ կլինեմ քեզ մինչ վերջին շունչս: Ես լավ եմ, ես քեզ պատմեցի ամեն ինչ, դու հիմա գիտես, ո՛չ, դու միայն գլխի ես ընկնում, ինչ շատ եմ ես քեզ սիրում, և միևնույն ժամանակ իմ սերը փայտի պես չի ծանրանալու քեզ վրա: Դու իմ կարիքը չես զգա. դա ինձ հուսադրում է: Ոչինչ չի փոխվի քո հիասքանչ, լուսավոր կյանքում... Ես չեմ կեղտոտի այն իմ մահով... դա հուսադրում է ինձ, սիրելի՛ս:

Բայց ո՞վ... ո՞վ կուղարկի քեզ սպիտակ վարդեր ծննդյանդ օրվա առիթով: Ա՛խ, ծաղկամանը դատարկ կմնա, տարին մի անգամ այն էլ չի լինի վարդերով լի: Սիրելի՛ս, լսի՛ր, խնդրում եմ քեզ, սա իմ առաջին ու վերջին խնդրանքն է քեզ... կատարի՛ր այն հանուն ինձ. ամեն տարի՝ քո ծննդյան օրը (քանի որ դա այն օրն է, երբ մտածում են քո մասին) գնի՛ր վարդեր և դի՛ր դրանք կապույտ ծաղկամանի մեջ: Արա՛ այդ, սիրելի՛ս, արա՛ այդ, ինչպես ուրիշները տարին մեկ անգամ հոգեհանգիստ են պատվիրում մահացած հարազատի համար: Բայց ես էլ չեմ հավատում Աստծուն և չեմ ուզում հոգեհանգիստ, ես միայն քեզ եմ հավատում, ես միայն քեզ եմ սիրում և ուզում եմ միայն քեզանում ապրել... ա՛հ, տարին մեկ անգամ, աննկատ ու անաղմուկ, ինչպես ես ապրում էի քեզ համար:

Խնդրում եմ քեզ, արա՛ այդ, սիրելի՛ս... սա իմ առաջին ու վերջին խնդրանքն է... շնորհակալ եմ... սիրում եմ քեզ, սիրում եմ... հաջողություն...>>:

Նա դողացող ձեռքով մի կողմ դրեց նամակը: Հետո երկար մտածում էր: Մշուշոտ հիշողություններ արթնացան նրա մեջ հարևանի աղջկա, աղջնակի, գիշերային ռեստորանի կնոջ մասին, բայց հիշողությունները հստակ չէին, աղոտ էին ջրի տակ շողացող քարի նման: Ստվերները գալիս ու գնում էին, բայց պատկերը ի հայտ չէր գալիս: Ինչ-որ բանի հանդեպ հիշողությունը ապրում էր նրա մեջ, բայց թե ինչ հիշողություն, նա չէր կարողանում հիշել: Նրան թվում էր, թե՛նա հաճախ տեսել էր այս ամենն իր երազում, խոր երազում, բայց միայն երազում: Հանկարծ նրա հայացքը ուղղվեց կապույտ ծաղկամանին, որը գրասեղանի վրա էր դրված: Այն դատարկ էր, երկար տարիների ընթացքում առաջին անգամ իր

ծննդյան օրը այն դատարկ էր:
Նա շփոթվեց. նրան թվաց, որ
անտեսանի մի դուռ բացվեց, և
ուրիշ աշխարհի սառը քամին
մխրճվեց իր հանդարտ բնա-
կարան: Նա զգաց մահվան
շունչն ու անմահ սիրո շունչը.
ինչ-որ բան բացվեց նրա հո-
գում, և նա մտածեց անցած
կյանքի մասին, որպես անպ-
տուղ տեսիլքի, հեռավոր երաժշտության:



Թարգմանությունը՝ Անի Շահնազարյանի

Քննարկում

Դասընկերներիդ հետ քննարկո՛ւմ կազմակերպիր, թե երբ է սերը կործա-
նարար դառնում, և ինչ է անհրաժեշտ դրանից խույս տալու համար: